

地 130.125
42.31
= 4

增修縣志

李澤遠題

叁



鷓澤縣志卷二十六

藝文

毛萇為河間獻王博士倡明詩學傳授生徒遂使秦坑之後三百篇之義炳如日星大漢文章卓越千古邑為毛氏生長地流風餘韻歷世常新宜乎人文蔚起著作爛然覽之者咸知溫柔敦厚風雅遺型猶在也因輯其有關地事及詩文尤雅者與詩傳諸篇並載志藝文

著述

漢

毛萇 毛詩二十卷

明

郭潤 春秋宗傳四書一得

陳厚 元齋杜吟集

劉誠 千秋日鑿錄周易演辭

趙熹 洪範補註皇極經世補註詩經會意

郭都 西田文集

賈熙載 勸民格言

劉錫 鍾菴文集

康應乾 濟齋遺稿

殷大白 四書五經副墨

殷淵 蒙宛錄

清

鷓澤縣志

卷二十六

藝文

殷岳 留耕堂詩集

苑育蕃 深柳堂詩集

齊祖望 讀易辯疑尚書一得詩序參朱說禮正誤四傳偶筆素心堂集增補沈寃錄

齊祖頊 樂道堂文集千文古事澹菴書鈔述異編忠孝詩纂略

王寬 四書小解菊花百韻詩

奏疏

請賑濟疏

山東巡按 劉錫

為地方連年重災懇乞天恩破格賑濟以救民命而安地方事據山東布按二司守巡東兗道左參政鮑道明副使王教呈據兗州府申查得上年賑過沂費等二十四州縣支過雜糧八萬八千九百七十二石零米二萬八千九百五十石銀一萬二千九百餘兩分投委官加意賑恤是以垂亡之民得以延至今日不期今春亢旱二麥無收至夏復遭大水田禾盡行淪沒民無貧富家家缺糧處處告賑冬春之間所屬二十七州縣俱當賑濟其合用錢糧比照上年必當加倍預備但本府併所屬州縣倉庫俱空賑濟錢糧實難措處等因具呈到臣臣會同巡撫山東地方都察院右副都御史沈應龍設策賑貸以安民心已經備行各官議處賑貸去後今據前因議照山東兗東二府所屬州縣今歲水災重大實與去年相同而人民饑荒較之去年則甚蓋災傷去處既闊倉庫積蓄又空移粟則無糧移民則無地以兩府之廣生民之衆坐懸罄之室待就水之期萬一不逞之徒招之難保其帖然無事也况前項饑荒地方實漕運經行之路國儲命脈關係不小雖潢池弄兵旋當殄滅而一

切資調所費已多與其戡亂於已然不若弭患於未然之爲得也伏請給臨清倉或漕運糧米二十餘萬石併內帑銀數萬兩與臨清倉原貯本省各兵糧米一併支發容合臣等分發被災州縣督同該道委官及時賑濟不惟有以活垂亡之民亦可以銷未萌之禍矣地方幸甚臣等不勝懇切祈望之至緣係地方連年重災懇乞天恩破格賑濟以救民命而安地方事理爲此具本專差承差劉尙節親齎謹題請旨

報獲賊疏

前人

爲擒獲各省逆賊首惡事參照逆賊師尙詔極惡無將罪盈不道縱應死之獄至幾千人殺無辜之民以數萬計誠聖世之大愆天誅之當旋者也再照師尙清史其李汝義贊助元惡安居僞官律應均坐王保兒等羽翼羣姦肆行劫掠事屬故犯法無可原各擬前罪情俱無枉及照師尙詔等糾烏合之衆逞狼顧之雄聲徹兩京勢搖六省仰仗皇上神威遠布廟算無遺協從奪心渠魁授首臣等待罪東土幸道他虞念藉洪休何勝私忭但此賊兇奔鼠竄雖當擢敗之餘詭跡潛形尙蓄猖狂之志乃臨清兵備副使李憲卿莘縣知事江文式令嚴譏察坐獲元兇此則陳力矢心功應重錄者也曹濮兵備副使董德明署都指揮僉事李明元法密隄防躬擒捕寇此則合謀共事功亦可嘉者也巡撫山東地方都察院右副都御史沈應龍藩籬謹而睥睨沮謀指視明而官民用命早除惡本陰

鷄澤縣志

卷二十六

藝文

二

折禍萌此則體國奉公功應首論者也伏乞勅下兵部再加查勘如果無異將沈應龍等查議功奏請陞賞該道縣委官郭世卿等民兵劉棟等量給賞犒以彰聖政以勵人心逆賊師尙詔合無容臣會同巡撫都御史沈應龍押赴市曹處決傳首河南地方梟掛惟復容河南巡撫官差人取至彼處併師尙金王廷用等查問處決師尙清等就近山東行刑免送河南以省勞費有名未獲逆賊師尙遵等併師尙詔等各律應違家口及應沒官財產備行各該撫按官徑自督拿查問施行緣係擒獲隔省逆賊首惡事理未敢擅便爲此開坐具本專差承差劉承訓親齎謹題請旨

辨冤疏

關南副使 殷大白

爲微臣奉調入郟遭仇陷禍叩乞聖慈憐勅督師虛公覆察明大法以合人心事竊惟人臣以身受職一旦殞首沙場固所上願卽不幸而爲法受辜倘果由失悞梟磔何辭乃臣奉調入郟後人而發先人而至無令敢違因隙遭陷致閣部嗣昌參奉嚴旨轉批究擬坐以失悞軍機之律皇上明共日月遐邇呼天臣不能不號控一言以祈憫察蓋臣罹此慘罪由郟道周夢尹陷之也臣與夢尹同事一方臣疾惡如仇尹身爲穢府至爭老蕩賊之安插爭金漆潦之防江講折俱有大案而直發其繼僕通賊黃金三斗之私夢尹於臣遂成不共不至殺臣不已去年十一月初三日督師調臣檄稱賊勢南趨入郟聽令未嘗云賊勢西突迎頭剿殺也臣必直抵郟陽然後有令可聽迨臣捧檄入郟而

夢尹捕風構陷以賊闖白土關捏報督師矣州縣塘報俱在賊由松杉連線河入平利南界未經白
上且白土非關無城隘居民可守架言闖關聳聽閣部以此坐參臣罪矣尹又捏報十六七日移文
止臣畢竟不聽乃臣二十二日抵郢城西七十里始得尹咨架言十六發行不知此數日者尹之信
使何在且同日一奉閣部符付一接郢道咨文閣部令之來郢夢尹止之勿入聽閣部乎聽郢道乎
閣部繼復以此加參夫使郢道果有所稱令旗相示臣不疾走西歸寸斬奚怨然而索之烏有也又
使原奉檄文果有迎頭截殺之語臣不由竹溪臣罪當死乃所調入郢聽令原爲賊勢南趨者二十
九日奉到符文尙謂原調入郢助郢撫斷山之用何嘗有迎擊之算今乃以此告之皇上爲臣之死
案耶道臣無竟提撫兵之權候詳而携本色順流尤出遵令止因南趨西奔兩計相背夢尹從中捏
陷不得不委臣以不由竹溪之罪是役臣於郢殺臣於竹未與臣於殺賊之區先坐臣以失道之罪
由竹溪三字何以申大法而服萬世之心也乎叩乞皇上勅下督師嚴察闖關之誣電臣未嘗失悞
之罪少加剖明微臣幸甚天下幸甚臣曷惶悚待命之至爲此具本差男生員殷淵齋捧謹具奏聞

齋奏疏

廩生 殷 淵

爲臣父疏控齋奏臣身抱病愆期泣懇聖慈憐察事竊照淵父大白遭仇陷害泣血籲天拜疏發自
西安於六月二十四日差淵齋捧入告不幸行至閩鄉疽發於背延醫急治伏枕一十三日始得回
生又值處處荒寇梗塞遲至本月二十六日方達都門忽聞已奉軍前正法之旨淵一痛殞絕死而
復甦恨此殘軀萬礫奚補不能星馳赴闕早徹天聽而事至後期淵父畢命且夕更隱忍不聞是終
忍於背父也皇上方以孝治天下安容有此人子哉謹泣抱原疏匍匐上奏叩乞聖恩俯鑒淵父雖
爲法受戮原無失悞軍事之實一蒙睿照淵父死有餘榮不然遲悞父命不孝之罪致萬死難贖矣
淵不勝哀鳴待命之至

呈稿附

廩生 殷 淵

爲皇恩大赦懇祈察例代題以雪沉寃以扶歸樞事竊惟父前任陝西關南道副使殷大白於崇禎
十三年禍被閣部楊嗣昌參題爲飛報獻賊西奔事奉聖旨督師輔臣提究轉行署按察司汪批西
安府廳會審招擬邊達充軍蒙申未允再行按察司楊核議府廳縣覆審加擬重辟坐以領兵官已
承調遣不依期進兵策應因而失悞軍機之律矣具題候旨未下於十三年七月二十二日羈繫中
暑久痢醫藥不效以死前後差官相視無異經中閣部奉有軍前正法之旨緣病故在先奉旨在後
察明移咨到部業經一載第以寇盜阻塞文移稽遲至今未到生員泣守靈柩年復一年三千里外
米珠薪桂衣囊罄盡惟有執紼待斃而已忽抄傳抵報十四年二月初十日刑部等衙門接出聖諭
大赦中外於赫皇仁遍燭幽隱之寃弭開三面之網生員父服官十有八載積有政聲在興守城著

十大勞績野戰稱三大奇捷如修敵臺儲戎器教技射墾荒田信賞罰緝奸宄飭江防通商賈禁暴兵恤長吏十大勞功各有實績另冊總非貪庸喔呢之所能辦者興元到任三日卽背城借一以走關索威蕩賊仍智激關索劫殺蕩賊一千餘名積屍江岸行令路官王國愛等掩埋諸上臺通知不掩取報功興元盤踞數萬之賊崇朝廓清此其稱戰功者一再閱數月有鳳凰山之捷禿尾狼邊賊一股掠入州界夜發練兵監生劉其明領鄉兵五百餘名追賊三晝夜行五百餘里及賊斬級以百計獲牛騾驢以三百計弓矢糧糗俱爲我奪此其稱戰功者二期年又有小目連之捷領兵將官張鵬翼監生劉其明等水陸並進冒險攻山斬賊一百二十九顆解散難民三千餘名號佛滿山戈甲填路此其戰功者三塘報各院一一在案已經具題下部而拙守無營亦灰滅而無餘矣其餘真心實政捕斬零賊不敢一一枚舉瑣陳於憲臺之前興元斗大孤城十年寇殘無兵無餉甚且無民張空拳以撻伐責虛甑而設炊者諸上臺無不洞悉無不嘉勵以爲第一清操第一能手祇以剛心正氣爲權奸所不容急公趨令而反以後至蒙冤生含不洗之羞死無依泊之所暴極逆旅血灑九泉海內仁人君子聞見無不慟心生員自恨力綿識淺日夜悲號徒懷吉澗代死之誠終鮮緹縈殺父之績恭讀聖諭二款一監犯替廢篤疾及七十以上者卽與請奏奪一內外各衙門凡凌遲斬絞永遠充軍終身等罪果有事涉曖昧情可矜疑及情輕罪重律例不合者俱着覆審分別減等奏請定

奪欽此竊照生員父罪犯病故照替廢篤疾及七十以上例情倍可矜又監軍文吏原非爲領兵官所監之兵自有副將趙大堵在爲之統領律例不合者一也閣部調兵原助鄖撫入山之用原檄具在非取迎擊原無期限生員父除聽詳順流七日而抵鄖爲聽令之所無悞期限律例不合者二也賊自馬軍山起營東西二千餘里曾無主客一兵一將前後擊賊生員父策應誰何律例不合者三也賊盤踞州境二十日進不得攻退無所掠紅土坡一戰斬其目小關索等一十七名志折氣阻復馳而南生員父奉督撫令當陣身先士卒四鼓出城幾陷虎口所屬城邑堡寨一無失陷有何失機律例不合者四也當原賊無闖關止憑於荆道讐口之捏報閣部更有另酌進止之文情輕罪重律例不合彰明較著矣生員父投審具有揭帖覆疏辨揭鄖興地理圖說奉文月日表文移抄冊共五本經投各院旣審定律具有微臣奉調入鄖遭仇陷禍一疏奏達睿覽備述始末經投內閣科部各衙門念載忠勤一朝益死應在聖主洞察中故留中未下生員父羈囚著述補註三經四書具疏而後絕粒生疴病痢不恪一死所飲恨而吞聲者獨是當原調兵之意出於周夢尹之邪謀朋比咨移所稱獻賊西奔鄖襄之間年來快事者生員父永訣趙副將書曾經指出揭尾所稱情之深者未敢揭揭言之是矣閣部原調秦離兵取疎秦防放賊入秦以委罪於秦之督撫迨賊終不能入秦而始撫拾沓問特參一有功無罪之道臣以卸飭已過使生員父無奉令人鄖坐守興安當由房人漢中

要道賊何自而萌西奔也耶賊之西奔閣部實使之夢尹實串合之張機發機雉羅兔脫煌煌天語事涉曖昧蓋爲生員父發之覆者雖益死經歲骨枯肉冷而事關朝廷賞罰之大公道不白於人心安望其磨礪一世爲忠貞趨事之的乎人臣品節所關寃魂莫訴泣懇大宗師慈亮無方正直是與察照恩詔內覆審奏請定奪事例批發按察司一一詳核監軍果否爲領兵官原檄調兵果否爲聽令人鄭有無期限獻賊西奔果否經松杉河遼線河一帶有無塘報可據白土有無關隘攻闖等情鄭道捏報關有無爭執防江招安蕩賊讐隙並在興治狀城守十大勞績有無虛飭三大戰功有無塘報在卷逐一察明代題昭雪並准扶柩歸里少慰忠靈於世道人心尙留不幸中之幸耳爲此泣血具呈須至呈者

傳

毛遂傳 節錄平原君傳

史記

秦之圍邯鄲趙使平原君求救合從於楚約與食客門下有勇力文武備具者二十人偕平原君曰使文能取勝則美矣文不能取勝則歃血於華屋之下必得定從而還士不外索取於食客門下足矣得十九人餘無可取者無以滿二十人門下有毛遂者前自贊於平原君曰遂聞君將合從於楚約與食客門下二十人偕不外索今少一人願君即以遂備員而行矣平原君曰先生處勝之門下幾年於此矣毛遂曰三年於此矣平原君曰夫賢士之處世也譬若錐之處囊中其末立見今先生處勝之門下三年於此矣左右未有所稱誦勝未有所聞是先生無所有也先生不能先生留毛遂曰臣乃今日請處囊中耳使遂蚤得處囊中乃穎脫而出非特其末見而已平原君竟與毛遂偕十九人相與目笑之而未發也毛遂比至楚與十九人議論十九人皆服平原君與楚合從言其利害日出而言之日中不決十九人謂毛遂曰先生上毛遂按劍歷階而上謂平原君曰從之利害兩言而決耳今日出而言從日中不決何也楚王謂平原君曰客何為者也平原君曰是勝之舍人也楚王叱曰胡不下吾乃與而君言汝何為者也毛遂按劍而前曰王之所以叱遂者以楚國之衆也今

鷄澤縣志

卷二十六

藝文

六

十步之內不得恃楚國之衆也王之命懸於遂手吾君在前叱者何也且遂聞湯以七十里之地王天下文王以百里之壤而臣諸侯豈其士卒衆多哉誠能據其勢而奮其威今楚地方五千里持戟百萬此霸王之資也以楚之疆天下弗能當白起小豎子耳率數萬之衆與師以與楚戰一戰而舉鄢郢再戰而燒夷陵三戰而辱王之先人此百世之怨而趙之所羞而王弗知惡焉合從者為楚非為趙也吾君在前叱者何也楚王曰唯唯誠若先生之言謹奉社稷而以從毛遂曰從定乎楚王曰定矣毛遂謂楚王之左右曰取雞狗馬之血來毛遂奉銅盤而跪進之楚王曰王當歃血而定從次者吾君次者遂遂定從於殿上毛遂左手持盤血而右手招十九人曰公相與歃此血於堂下公等錄錄所謂因人成事者也平原君已定從而歸至於趙曰勝不敢復相天下士勝相士多者千人寡者百數自以為不失天下之士今乃於毛先生而失之也毛先生一至楚而使趙重於九鼎大呂毛先生以三寸之舌彊於百萬之師勝不敢復相士遂以為上客

元達傳

宋史

元達初名守晏洛州雞澤人身長八尺餘負膂力善射家業農不任作苦委耒耜慨歎而去之事任俠縱酒嘗醉見道旁槐樹拔劍斬之樹立斷達私喜曰吾聞李將軍射石虎飲羽今樹為我斷豈神助歟嘗從少年數十百人欲起為盜里中父老交戒之乃止時郡以戶籍調役達當送徒闕下行數

舍乃悉縱之曰吾觀汝曹亦丈夫也豈樂爲是哉可善自爲計吾亦從此逝矣已而郡遣追捕至則達授弓引滿待之追者不敢近由是亡命山林間爲鄉里患太宗居晉邸時達求見得隸帳下嘗侍太宗習射園中命之射達射四發不中的已而連中上喜爲更其名曰達及即位補御龍直隊長雍熙初累遷爲州刺史繼領本州團練使時州郡部送亡命者至闕左右諷殺之達奏曰此類竄匿者衆豈能盡殺之哉不如赦之以開其自新之路且以成好生之德上悅因悉原之端拱二年擢侍衛步軍都虞侯領幽州刺史歷北面行營都部署由常山鎮入爲京城巡檢淳化四年卒年四十二贈昭化軍節度達雖奮自草野歷職戎署至交士大夫能折節盡禮人以是稱之

齊宗閔傳

副使 康應乾

齊公臨溪者諱宗閔字子孝謹厚信義君子也行年八十有五客冬扶節造不佞之廬歎歎太息曰某奄奄耄矣咫尺爲泉下人惟子知我誌銘之役敬以屬吾子不佞德公也深知公也素可無言爲公紀竊思公善調攝吐納之理遐齡未艾閻浮世界修知難遇倘一旦犬馬先溝壑不竟負公知哉然誌銘又不可以預設請爲公立傳可乎按公世爲雞澤人居邑之西南鄉柳下村四世以上無可考高祖諱有才者家世業農生端端生福是爲公大父始延師教子彬彬乎向於禮矣福生錦卽公之父義民冠帶家溫食厚好善樂施嘉靖初歲大稔輸粟救荒本府給匾旌之曰尙義云元配馬繼

雞澤縣志

卷二十六

藝文

七

配吳生三子長宗堯任巡檢次宗舜俱馬出次卽公吳出生於遺腹穉穉邈孤生而失怙然猶幸兄相庇也此年十二兩兄與之析居矣然猶幸母相依也比年十五母氏爲之辭世矣形影相弔進退無門悠悠世途抑鬱誰語時爲仰天椎心肝腸摧裂已耳居喪哀毀骨立一如成人禮事兩兄如嚴君迨年十七家計漸凋鉛槧之願莫酬刀筆之途聊試歷役本府守法奉公會郡守趙公欲照大江以南行條鞭法而恐北地之未協也爰集羣吏商之衆無辭置對公獨抗聲曰善於是左擘右畫朝陳夕議三年卅成犁然大有當於郡守之旨乃申呈臺使者詳允至今行之無不稱便維時備兵使者毛公亦知條鞭之舉悉出公裁檄本縣優獎之自是道府申呈文移一切諮之於公卽立報可以當事者公精白一心絕無私寤假之爲白潤計時對知者慨然曰吾不幸不能讀書取科第就此異途謹奉三尺惟勤卽上臺憐我屢垂明問凡有條議祇期畢此一得之見以不負委任已耳脫有秋毫覬覦墮落名檢狗彘當不食吾餘也初選山東蒲臺縣典史歷陞漢州之吏目沁水縣主簿尋改濟陽縣主簿歷官四任俱有能聲始終廉勤如一所在羣邑長吏罔不折節延訪時政得失奉以周旋馬濟南殷太宰稱之曰齊尉眞循良吏彼頭巾子遠弗若也可銓者竟束於資格轉趙府典儀正公惟義命是安援七十例致仕歸里時與野老嬉遊園圃商雨較晴求田問舍或持籌計生業或俯几覽羣書或揮麈而談仲長統樂志之篇或鼓掌而詠陶淵明歸來之賦置鄉人於不校取仁義以

存心邑大夫敦請以爲鄉飲賓桑梓中尊信以爲宗盟主乃其桂蘭森茂曾元繁衍冠裳濟濟詩禮振振張君之後百忍堪追于公之門駟馬可待矣應乾曰余於臨溪齊公而悲人事焉夫漢廷置相不外刀筆國初掄才爰有三途乃今則倚重科目矣彼橫金拖紫享大官之俸者奚啻九遷而喙長三尺手重五斤試以當盤錯之用蔑有濟也甚或簞簋不飭笑罵由人還以方公之才品愧矣無論公仕卽其孝友性成義讓律己清真足以集事忠諒足以維風當於古人中求之而仁者後必昌余又幸有天道焉

殷仲子傳

貢生郝挺

殷仲子名淵字澄之副憲大陸先生之次子也性簡亢不屑一切卓然以忠孝自負年十四補弟子員尋食餼讀書明大義論著高闢爲文孤奇傲岸意所祇服於古不數人俗士相與非笑之仲子益自信仲子事大陸先生最孝兄伯巖氏與仲子最友善而仲氣沉摯其敬慕尤篤諸所爭執不憚十勸出於德愛之誠以故伯巖愛而敬之庚午伯巖舉高第仲子志未售遂却閉營小室於邑之別墅將厲秣爲必勝計而太夫人以佐大陸刺犍爲計至仲子卽趨赴日號涕蠶叢鳥道間扶欄歸方藁葬未息肩念先生獨遠仕形影相弔復束裝提三尺劍涉萬里趨侍先生積三年不稍內顧先生迫令旋里出郊泣復返其篤愛則天性也會先生以治叙最選關南使備兵於興元未至而老蕩蕩關

索諸賊據險結陣遮先生於洵江上下仲子進先生曰州人無主緩則賊乘其空我從間道遶出賊背使倉猝不知所出則賊可殲也先生頷之遂乘夜疾行由深澗越嶮嶺馬聞不能行又夜沉先生憊甚仲子左執劍右掖先生行六十里比曉竟得抵州州人呼躍震天地賊奪氣遁去仲子偉幹黝目面矐黑鬚髮怒張每至輒先登大呼所至辟易故先生鎮興年餘斬渠魁散酋從墾荒塞繕城雉扼劇寇使不得西則仲子之力居多初武陵昌視師襄楚間謾謂賊易滅及屢敗賊愈熾昌懼誅又以前括餉與先生意不合遂誣劾先生違令失機以委罪自謝有旨下大將軍對簿昌持之益急仲子乃疾駟至京師擊登聞鼓上辨且劾昌姦庸誤國狀時昌方荷隆眷近貴皆比噤無敢直先生者疏入上不憚嚴法令罔奏舉朝震動仲子暴血誠以死生爭之中辨不稍挫移乃得蒙聖慈置弗問而前所執昌疏亦留中不復下會先生以病卒咸中仲子長號泣血與伯氏巖捧靈旛歸葬焉仲子自傷貧賤不能鋤姦雪恥抒嚴父之情雖漆身矐目思一割姦人之腹而未有當也是時仲子聲名籍甚燕趙節義之士爭向慕焉仲子高峻治廉隅是已遂前恥居人下交遊落落不假合人亦多畏憚之襄事畢聯里社冠帶之倫執爵醕申六義期興物教民以廉恥敦睦之行移易頹俗後見國事日非知天下將有事遂杖策入西山築室於太行之巔讀經濟書蓄死士學技擊彈射星歷占候輿圖山河險要無不精徹甲申逆闖北犯闕置僞署屠戮縉紳河北郡邑冠蓋者皆迎拜恐後仲子

隱太行山忿甚作三月一日詩以見志及後神州陷沒聞先帝之變乃呼天飲血偕所養士得數十百人遂仗劍馳入邑城僞令毀服遁匿仲子設先帝位發喪召士民中以大義馳檄徵兵舉大事遠近爭應之而城中部勒尙未就會僞將軍爲王師所敗擁衆南竄人心震搖而先時從賊諸牙儉恐事成並誅因乘機追入僞令賊勢復熾諸人以事敗稍引避仲子辭不去賊至抗聲怒罵不少屈遂死夫子廟之西側仲子有大志洪經術多壯略彬彬質有其文思以大用於世而數奇不逢時遭君父之難忠孝俱困君子傷之

殷岳殷淵合傳

檢討 申涵盼 永年

雞澤殷岳殷淵兄弟皆能文負奇氣爲河朔間賢豪士岳字伯巖號宗山修髯廣頰喜賓客好遠遊淵字仲泓鬚張目黝兼有膽力兄弟爲制舉業各不相下岳文雄博有聲勢庚午舉於鄉淵文峭刻不易解故屢困躓諸生聞父大白起家孝廉仕關南道憲副當往來川陝間兄弟皆從岳嘗探奇岷峨太華之巔据石長嘯盤礴不忍去淵則舞稍擊劍以數騎破賊萬餘軍中皆驚傳殷公子神勇時楊嗣昌拜劍視師陷兩藩素卿大白剛介遂以逗撓罪委之法當死淵徒跣伏闕陳寃狀不報大白仰藥卒岳兄弟髮指皆裂相瀝血志在必復仇退而養死士將乘間爲荆聶計會嗣昌誅乃已時以歌賦發其悲憤聲隨淚下甲申亂兄弟避難廣羊山結茅椽地以箕穎之節自期許邑僞令檄召之

雞澤縣志

卷二十六

藝文

九

淵叱曰好頭顱暫寄項上耳賊安可見也因與兄出謀爲莊烈帝發喪舉義兵討賊淵伏劍先發岳載甲械後從僞令聞之懼毀服匿淵入賊方率人發喪制服痛哭文廟中而諸蠹役素佐賊令爲虐者恐事平並得重譴遂與僞令秘謀乘賊率潰衆南下聲勢人心惶惑遂率其黨執淵於明倫堂淵抗聲怒罵不屈死時年蓋三十有八也僞令遣騎捕岳岳未及城十里聞變遽易服走賊追之急會家鳧盟夜遣精甲自郡往迎殺其叛奴張問仁方免於難岳遂南渡依漕使者白公抱一至金陵寓雞鳴寺每夕登樓痛哭人皆莫測其意中原既定岳上疏理弟淵事置佐賊諸役於法都檄謁選得睢寧令皂帽布袍騎驢之官爲治清剛有父風無何得家鳧盟招隱書遂棄官仍騎驢歸里歸而結廬村僻顏曰巢壑與家鳧盟及張命士蓋相訂爲世外交時號廣平三君始爲詩氣格在漢魏間不作詹詹語然而好遊益甚襤被不解足跡幾遍天下遊盤山則公卿爭於結鄰遊百泉則與孫徵君定交遊岱宗則宿嶽頂欲觀日出遊大麓則愛其風土而有卜居之意天台嵩少林廬諸名勝及秦晉之交歲或再出所至攀躋如不及後又單車載所愛姬從故人入寧夏慕遊塞外登賀蘭山而歸嘗言小世界不足往來以不及遍遊海外爲恨晚年多病遊少輟然以好客故家貧甚饘粥每不繼會故人右開府閩中者慨然曰吾其爲武夷之遊乎遂裹糧往至卽病竟未及遊武夷而客死於閩年六十有八矣兄弟皆無子岳卒後以從子之孫渥爲嗣之紐字伯芽亦隱君子也

贊曰殷氏伯仲患難時家鳧盟始終與其事稱莫逆交予不及見仲宏而兄事伯巖故時時聽其抵掌談舊事或頰首欲泣或按劍欲怒或浮白擊節欲狂蓋悲歡所感觸也求之古人中伯巖類靖節而好遊仲宏類灌夫而死義豈徒以文藻博蜚聲哉獨伯道之嗟則蒼蒼者真不可知矣

殷之紐傳

檢討 申涵盼 永年

殷之紐字伯芽號樊桐鷄澤人也少受學於叔祖憲副大陸公大陸公二子伯巖岳仲宏淵皆公叔父行年少於公磊落多俠氣公獨平易近人沉靜好讀書是以二叔聲望日籍籍在人口而公名不出閭里間大陸公獨顧而奇之曰此吾家有道也反命二子從之學公爲二叔講解經書大義日夜娓娓不倦故二叔終其身愛而敬之屢試棘闈不售辛酉值覃恩拔入國學廷試高等授知縣公志在科名恥不就甲子中副車於是遠近始知鷄澤殷生能文章有志操相州張司馬滿虛曲安劉司空簡齋爭執東邀之欲爲其子弟矜式公笑曰嘻吾豈以硯田博溫飽哉拒不往甲申以後遂晦跡逃名決意超然於物外時國家初定需才甚急凡七奉部檄催就選公堅臥不起自是杜門謝客足跡不出里巷自匾其室曰確堂確乎其不可拔也日讀書課子於室中嘗曰功名富貴自有天命至勵行修德利人濟物之道則一身所得自主遂留心經術研究理學凡古今興亡治亂得失窮極其源流自漢唐以迄宋元皆確有所見非徒口耳涉獵宋儒性理諸書無不周覽謂諸子各因所學起

鷄澤縣志

卷二十六

藝文

十

見遂分異同若折衷於聖人又何紛紛聚訟爲也其學一以躬行實踐爲主不事浮華鄉居三十餘年未嘗一謁長吏有司聞風式廬冀得一瞻丰采公率以老病謝卒不獲見皆歎息去時伯巖棄官歸居比戶唯唯暮一相過從以道義相敦勉而已伯巖好客客來公輒避去家素貧亂後益凋零薄田數畝不足以供朝夕公宴如也里中執經問字者戶外屢漸滿公開誠善誘士林推爲祭酒鉅鹿楊方伯猶龍負海內重望慕公行欲遷爲其子履吉師公初不應伯巖力勸之乃設帳於南亭猶龍大喜曰兒輩得大賢教誨矣踰歲歸老而好學益篤五經皆有論述尤喜讀易曰可以寡吾過年幾八十猶能作小楷類顏魯公麻姑壇行書得米顛筆意時仲宏先以義死伯巖後以遊死公晚年孤立鬱鬱善病年八十三而卒子仔能讀父書乙卯舉於鄉公猶及見之云

贊曰予嘗從伯巖坐間一接先生眉宇道氣迎人繼與令子孟肩定交乃悉其生平行事有踰垣避世之風使置古今高士傳中如先生者寧可多得耶世之輕於出處者望確堂而色怍矣

三姓同墳傳

苑立元

施馬張三姓者山西洪洞縣之大桑樹村人也世係比鄰情好誼篤有明永樂年間遷山西之民以實畿內遂同卜宅於浮圖店之東門裏同居共爨儼若一家迨其歿也仍歸一土迄今纍纍相望闔邑資爲美談嗟乎人之相親莫過於父子兄弟然往往骨肉相殘操戈一室分門各戶視若仇讐彼

三姓者聯異族爲同體合鄉黨爲一家生居一室死葬同墳豈其天性之獨良抑亦教化之有素與吁是可風也

武龍傳

教諭 尤淑孝 大興

武龍者雞澤槐橋村人也其父執競與伯成皆庠生乾隆十年冬執競與成之女口角成適患病惡其囂起欲毆執競誤跌地傷其尻訟之縣下執競獄龍出爲哭乞於官入則哀求其伯時雪深三尺寒可墮指龍往來鄉城間日數次伯憐之曰吾貸汝父矣龍喜入城市酒脯還饋伯及門聞哭聲知伯已死頓足曰官倘以伯之死由吾父爲之奈何吾當以身代哭而出越日見鄰井一尸乃龍也衆始悟官亦哀其志父獄旋釋時年二十方應童子試耳乃能捐軀援父不顧一死死雖愚而孝有不可沒者余叨秉邑鐸素嘉行以風俗固職所宜也爰爲作傳以記

補遺

殷宗山行狀

恩貢 申涵光 永年

予初識雞澤殷仲宏淵竦然異之已而因仲宏復識其兄宗山于燕市修髯廣頰抗首論天下事類世所傳河朔大俠者予自視蔑如也予幼時拙訥鄉黨無所稱述人亦統袴視之耳宗山一見引爲同氣曰此真吾友遂定交計此在己卯冬去今三十二年矣歷患難生死風波盜賊無一事不相共至于文章行誼之交成義兼師友古今有幾鮑子哉嗚呼已矣宗山少跣跣好遊俠雅然讀書有領悟筆力過人與仲宏齊名藝苑仲宏每試輒居前人以仲宏當早售庚午宗山舉于鄉而仲宏屢擯不錄蓋仲宏文刻深宗山文雄博有聲勢故易遇也宗山父大陸公大白以鄉舉仕至關南道副使清剛任氣有包孝肅海忠介之風忤權貴被譴以死宗山兄弟腐心泣血圖雪父冤就予讀書郡城午夜風雨嗚嗚然書聲泣聲不辨也癸未不第將謁選予以大亂將作約與偕隱宗山瞿然曰誠如子言褰裳去之恐不速反濡足耶卽日回里與仲泓結茅西山絕頂不復言仕進矣甲申之變予與鉅鹿楊猶龍思聖各携家避亂山中賊檄仲泓來見不從繼又爲崇禎帝發喪謀討賊僞令執之不屈死賊索宗山急宗山方從山中載兵械甲冑來未及邑十數里聞變遽易服走賊遣騎追之予

雞澤縣志

卷二十六

藝文

十一

時先已歸郡爲募死士夜馳精甲往迎殺叛奴張問仁乃免于難跳身遊江南南和白侍御抱一以漕使駐吳往依焉未幾予亦渡江同詣金陵寓雞鳴寺每夕登樓痛哭隣寓皆驚已而問知其故有來同吳者予以先端慙公墓文走華亭秀水與宗山同舟冒風雪擁敗絮孤蓬底咏哦相勞苦次歲旋里崇山上疏理弟事置佐賊者諸役于法部檄趨就選得睢寧令皂帽布袍騎驢之官所其治一切務大體抑彊而禮士與民休息民亦安之顧時時念予不置邀予往予蹉蹉不願以口腹相累也亦念宗山性質直多迂力勸之歸宗山覽書慨然曰豈以一官易吾中子哉遂自投劾仍騎驢歸里不持一錢曰恐無以見故人也宗山自其先世無所邑居鄉曰小砦大陸公仕宦二十年不能于邑中購一椽宗山歸少葺舊廬爲幽廊曲檻予每歲數過從隣邑同人畢至文酒交洽碁聲入夜扁其亭曰喻鳧以予自稱鳧盟子故也而予亦特置遲以待而爲宗山下榻之地久之宗山日益貧饋粥不繼散解僮僕以次賣其舊田朝夕一編手所纂錄累累堆几案從兄子之紐抱道隱居時相對讀書以爲樂自我輩數子外客來多謝去不見柴門反鎖向如山居蓋仲宏爲人咬冰截鍊意不可一世宗山坦易無城府往往與野老雜處而其惡見比匪面斥不假以詞色則皆有大陸公家法畏之者聞履聲輒避去宗山不顧也貧士一善足錄折行輩與交惟恐不得當聚諸士家塾中稱貸以供薪燭後多成名者邑令高其風多敬禮之有大利弊則力陳興革匡令所不逮而宗山自少時隨官

遍歷岷峨太華白門西湖諸勝棄如彼襍被常不解偶遊盤山過燕中宿西郊蕭寺魏相國裔介魏光祿象樞引爲布衣交公卿多欲見之者一夕逸去天臺嵩少及秦晉之交歲或再出所至攀躋如不及與予同遊秦岱者一同遊百泉林慮者再遊百泉以訪孫徵君先生先生喜留夏峰草堂者數日以節槩相黽勉登岱時方病腰脊不可屈伸及軟輿歷天門忽大叫奇絕下輿步登不知沉病之在體也與傳泉司維麟同宿嶽頂予與傳皆憊臥宗山欲觀日出已而雨聲浙瀝聞少止卽起視天上以星月隱見爲憂喜竟夕不寐也當遊中州愛大麓風土將卜居輦致家中書物久之以予不能偕往遂亦不果劉撫軍開府寧憂邀與俱登賀蘭山而歸常言小世界殊不足往來不得遍遊海外爲恨耳猶龍以屬籓人 覲至軹關病不前宗山爲左右三月病益亟念非傳青主不能起青主者名山太原高士精醫素不易致宗山曰非我自往無庸也時六月大霖雨晝夜行水石中數日邀青主至其重交游急人之難皆此類也少時不作詩睡寧以後成集予曰君才能大不能小能重不能輕干律非宜宗山以爲然卽焚其稿專力古誌源淳奧博淺人不易上口莽莽然肖其爲人間作古文詞及尺牘隨手酬答皆蒼然有西京遺意六十以外多病齒落獨筋力尙健時時不忘出遊予力沮曰我兄弟皆老宜常聚無僕僕道路爲也已戒行而止者屢矣劉撫軍改鎮閩中武夷之遊時在夢寐曰極知老不宜出然死于山水間不猶愈于纏綿牖下耶庚戌二月遂決計南行抵閩撫軍留

諸幕中未幾將別撫軍往武夷會疾作二日而卒六月二十二日也得卒閩中而遊武夷之志終不果嗚呼惜哉宗山志在四方山水間不期而亡郡杜龍巖雲禎在閩爲之經理其喪客死非所恨獨惜遠道失我良朋老懷益寂寞難遣耳而或者怪予不力沮之嗟乎宗山遭際之窮人生所未有也父弟皆被禍慘矣壯歲拂衣本圖娛老老來家道齟齬非人所能堪故此行亦聽之以其在外而安也亦孰料其遽至此哉仲泓死無子宗山亦無子近族中無可爲嗣者乃以之紐之孫渥爲嗣宗山名岳字伯巖宗山其別號也先世馬邑人遷雞澤數世矣隱于農至大陸公始以儒起家娶夫人田氏生宗山兄弟宗山娶康氏生一女適曲周張憲仲數娶妾皆無所出嗚呼其命也夫

記

翔建廟學記 金承安三年
知縣高球建

尚書
左丞 董師中 洛州

夫國家之興化有本原吏之為政有先後稽之舊令天下郡邑通得建立廟學以崇奉先聖教育人材庶其遵道德勸孝弟變民風而易民俗化之本原於是出焉今夫守令其任是責者與而在官者不以屑意至有宇舍久廢而不復與夫僅存而不葺又不以時修祀事勵生徒問之則曰獄訟或不得其情賦租有不登其數簿書冗而不治盜賊發而不得是吾憂也學之興廢蓋有司不責以為急者何與吾事嗚呼亦豈足與語為政先後之序者哉鷄澤為邑最古見於春秋時桑土沃美人物阜殷國朝天會初王師伐宋圍洺縣為土賊占據民廬公舍焚蕩無餘撫定後寄治於北臺頭村至今因之後之來者姑務增廨宇完治城郭而已承安三年正月馬君琢由崑崙州侯廉陞來此視事之三日當謁宣聖吏白以無所君愕然曰士不可一日無學民不可一日無教而况春秋釋奠著在典禮庸司闕諸乃召士人與僚屬議俄有邑民郭慶等五十餘來告曰吾邑雖褊小而讀書後進由宋至今未嘗乏人獨以學校不修無以居處講習有愧他邑今君銳意興建是將誨我子弟飭我閭里我等願出財力為君一切成之不必費官而勞人也君大喜曰汝意誠嘉然我忝而長不可以後之

鷄澤縣志

卷二十六

藝文

十四

遂與相縣之東南隅得亢爽地七畝而卜築焉於是縣令出己俸百千主簿縣尉各五十千郭慶等悉具所用財贖工備廩食其餘市民皆樂助工經始於是年五月朔畢功於四年六月祠有正殿曰大成從祀有位講有堂曰稽古其東西廡為肄業之齋有前後三間儲峙之庫庖福之位列以其序而後宏麗端正雄長諸邑既落成矣生員張環具其事來告漳川居士董師中為文以記始末居士曰鷄澤吾鄉屬縣也高令吾為御史中丞時臺掾也吾稔知其為人今於吾鄉士譽籍籍益信其為才吏也高君始至不累月稱治凡政令之下民趨勸之首議建學應者如響可謂有志而果敢為之者也秋八月上下始有事於先聖先師俎豆萃萃禮服燦燦升降興俯皆中儀矩父老嗟嘆復見太平令典邑人化之則禮讓以興爭訟以息然則勸學之道豈曰小補之哉余既善君知為政之先後不以有司所不責者為不急又喜慶等至誠以成君之美為吾鄉光顯事皆可書也於是乎書

重修文廟記

劉錫

我庠孔廟日就圯庠博士若弟子員久用為戚隆慶己巳歲督學殿卿陳公來按我博士徐君衆弟子員請諸郡守賀公以狀白陳公曰噫廟圯至是極乎工曷容已遂發教計工料費屬邑尹缺郡倅王公來攝符體士官得聶鍵殷濂良刻期事事兩人奉令惟謹日夕督工滋力廟垂成緒業門廡今年夏五月兩士官已於事而竣如王公之素邑尹張公博士凌君中事觀厥成徐君曰是役也諸當

道德意在不可無記合其徒拜所予言予無以復徐君則粗與說學夫學者所以學爲君子也是故論語始終君子當其廟貌初新釋菜安主徐君凌君羣弟子員虔拜瞻得無如吾夫子在乎孔子道載六經教普萬世乃其要則論語朝家興學育才造端論語正期士子人爲君子吾邑土瘠民貧易與爲善矧士也民先鄉先賢祠在足可師範徐君凌君明倫教言班班有條循是嚮往文日博識日正造履日熟出官服政無負天子無負所學乃曰君子如其蹶本濁源唯支流是務卽詞章藻奕聲華籍甚祇富貴利達階媒實愧鄉先賢實背教言實負諸當道體天子新廟意如吾孔子論語何諸士子幸無自後君子

建鄉賢祠記

教諭 李一寧 東莞

正德己卯整飭大名道兵備河南副使劉公奉命兼蒞畿輔重地按歷郡邑謂鄉賢風化之原也乃命郡邑建鄉賢祠檄下有司祇承德意鳩工掄材建祠於學宮之側擇其道術有耿光者祀之雞澤稽之故實采諸輿論得唐處士馮先生仁海郭先生守素國朝員外郎趙先生稟參議郭先生恕劉先生誠是皆行義足以勵俗功業足以輔世祀之宜也事集當有言紀於石用張大公崇正化民之意於不朽嗚呼居上治民不患其弗循而患防之無具不患防之無具而患動之無機動之云者因其心而鼓舞振德之故驅而之善也易不尤愈於徒恃其未以防之者乎是故義欲其精精則弗悖

雞澤縣志

卷二十六

藝文

十五

於正禮欲其嚴嚴則足以感人我國家建學育才非聖人之道弗以講可謂精矣每歲春秋仲丁祀先聖先師輸報本之誠非其鄉之賢者郡邑不得別立祠以祀之可謂嚴矣先聖先師道術之宗化民之源也鄉賢行事之實耳目見聞教民之要也有源以爲之歸有要以爲之趨故民日遷善而不倦鄉賢之祠誠有裨於世教今之郡邑間或廢而不舉得非闕典也耶禮祀先聖先賢畢卽釋奠於先老成均之法合國子弟擇其道德者使教焉歿則祭於瞽宗是祠也其先老瞽宗之意與公之拳拳致意者端有見矣晦菴先生徽人也徽人祠之勉齋黃直卿作記以惠徽士曰思其人不若尊其道慕其迹不若師其心良以士者教化之先也今之後學生於諸先生之鄉慨想其風聲行義思其人慕其迹者多矣抑能心其心而道其道否乎盍相與勉之是亦今日立祠之意也

重修武安王廟碑記

賈熙載

余竊怪世人往往爲邀福計傾囊貲修淫祠曾罔惜費至於應祀正神則頑冥弗悟吁惑矣哉余邑治北當南門衝舊有武安王廟以爲北鎮中樹檺棘一株不知培自何代枯而復生人僉以爲神工之妙云其基聳其像最古第歲久漸以圯時鄉官慶陽別駕王君世爵往謁愀然動心曰夫立廟以妥神也以萃渙也今若此其如神人何亟謀諸鄉老陳舜道王以梅柴堡許汲輩各捐若干鄉義士聞風助貲若干飭廟貌整牆垣新神像不旬月棟宇嚴肅金碧輝煌厥功告成斬余紀歲月余聞左

氏曰鬼神聰明正直記曰聖王之制祭祀也以勞定國則祀之能禦大災則祀之能捍大患則祀之公在三國時孫權虎視東吳曹操雄鎮西魏炎漢神器幾顛乃輔蜀漢先主牧荊州兼資文武威鎮華夏故史稱有國士風又云雄略過人一世之傑竟成三分鼎立可謂以勞定國者至如達旦秉銀燭長途驅玉輦與夫絕孫氏婚眇曹瞞德其聰明正直疇與埒者公既沒英靈耿耿如生何代不顯宋祥符七年鹽池水涸公陰戰破蚩尤元佑四年封爲義勇武安王詔天下郡邑建廟奉祀以酬殊勳我明太宗時更著靈異嗣是廟宇日益增曩歲嘉靖癸亥天雨浸淫河水泛漲余廣武暨敝邑城將沉沒郡邑不沼者幾希胥賴公保全無虞迄今父老傳頌不置其禦災捍患又疇與埒者是宜祀茲舉也神可妥渙可萃於余心固愜當余又竊怪世人廟宇神像類皆修之至於吾心之神受帝命宰靈臺其尊無兩乃浸不修省任其污穢敗壞以致神譴鬼責而卒莫之悟也謂之何哉故由問事鬼而孔子告以事人用是知幽明一理必明無人非斯幽無鬼責余願與四方同志者修吾心之宇以修在廟之宇事吾心之神以事在廟之神不識然否

重修城隍廟記

敘論 李一寧 東臺

皇明肇造區宇釐正祀典城隍有廟徧於天下鷄澤爲廣平屬邑廟之修壞亦屢矣宏治甲寅蓮幕張君嘗修之廟之後有寢以安神靈廟之前有臺以駿執事歲時伏臘足以奉典常顧儀門左右逼

鷄澤縣志

卷二十六

藝文

十六

近民居縱僅盈丈大門外爲縣治通達亦與市廛相比弗稱觀瞻况復卑濕每雨降輒壅水不可行有司艱於展謁常欲改作病於因循而未果也正德庚辰縣令車公作甬路四十餘步內屬於廟外接通達移建大門於其北卽故址創立牌坊扁額高懸屹然鼎峙而凡神之儀仗鐘鼓祭器莫不周治而完美之經始於是年三月落成於七月壬申廟貌整飭往來者改觀焉趙生延松輩游息於廟中別館表其成而請於予曰車公蒞吾邑職務修舉百廢聿新而是尤爲之本且指畫素定程督有方費不煩於官歛不及於民不數旬而役畢其功偉矣將托貞珉以垂不朽重惟先生圖之予竊惟陰陽相爲表裏人神本非二致蓋事神所以庇民而立祠將以報祀天子人神之主有司承下流而宣之城隍之祠職在祀典若或廢而不修得非治人之缺典與夫敬誠者感格之原而仁愛者治人之本德惠孚民然後馨香潛達百神受職則上天降康否則和氣不臻何以收治理之效哉車公是舉亦明治道而修其要體耳豈直觀美而已哉一寧不敏叨有斯文之責揜揚紀述固職之所宜爲也車公名棠山右石州人起家貢監歷陞今官

重修八蜡廟記

劉錫

八蜡廟舊在邑東郭莫詳創建所自歲久傾敗人用愴焉嘉靖二年間父老高寵等割地築基王茂等率作衆志鳩工飭料棟宇旋新居人走伏臘唯謹閱今三十餘年秋霖漫漫廟則汨沒時若高性

等復卽舊基創新宇經始嘉靖三十七年七月迄次年六月告成廟凡四楹各五架門凡二楹各三架繚垣載周方面各正衆忻如也按蜡祀載在禮郊特牲明甚國朝祭典不及實兼之社稷耳乃邑父老汲汲禮之若不可一朝無則以社稷祀勢不可槩與而年食地力不旱蝗諸水又忽不圖報反本重農是可知吾邑厚風矣昔伊耆氏始爲蜡察謂其仁至義盡吾邑之風其諸陶唐之遺而仁義之餘緒耶吾聞古之君子先成民而後致力於神是故農緣南畝婦子嬉饁卽郵表嘖安封豕已吞碩鼠禁竊卽猫虎安潔源清流慎經密理卽坊若水庸安螟賊不逞蠶食屏跡卽昆蟲安於以安先穡司穡司農以順成年穀而通八蜡卽社稷安是故社稷時祀通八蜡禮神通治人順民之情通體國誰非神之主而民之望國之屏翰乎當有是予言者

建碧霞元君廟碑記

賈名儒

縣城西北一里許地稱金龍口萬歷壬午邑侯陳公過厥處尋左右耄耄論曰爾邑春秋諸侯會盟今屬明天子股肱其地甚重採取堪輿宜立神祠鎮護爾方吾欲捐俸爾資疏詞爾募特爲爾建爾其謂何耄耄歡然諾應曰辱君注意誠造福一方也遂持疏竭誠往化四境及善信男女樂施恐後金粟磚瓦灰石一時雲集詹吉就役張大勅賈熙臯專督理高潤基建正殿四楹抱以大廈中塑碧霞元君左右塑像有稱元天聖太后配享元君列侍從女東西兩廊各五楹塑諸羅十王山門兩旁

鷄澤縣志

卷二十六

藝文

十七

三郎太尉廟各砌甬道繚以周垣壯麗厥度朱楹畫棟寶蓋幢幡泰山之景象也金碧輝煌燦然耀目泰山之聖容也歲時次舉焚祝虔誠入門鞠躬登殿戰色巍然雄鎮一方也君子曰廟修而成之宜也旣落成生員陳善道詣予請言鐫石記歲月嘗稽泰山五嶽之宗東方萬物始交之處博物志曰泰山天帝孫主召人魂魄知人生命長短自古封禪七十二君以降莫不崇奉迄今益勝復考諸圖泰山下有東嶽廟碧霞元君廟極乃巖峻元君則秉坤道之靈凝震隅之位擴兩儀無外之仁播二曜貞明之照握生機參化籍福善禍淫傾邪培正昭報鴻休錙銖不爽是故宋眞宗駕臨我世宗御極丁酉差官賚袍往旌竦黜之誠上動九重下及兆姓香帛等物來自萬方絡繹駢番裨國庇民歲約百姓感而遂通行宮之建窮鄉僻落天下何限矧予邑列畿輔東去泰山西百里許有感建祠棲之以神神之在天如水行地何往不存孚佑下土赫然顯功禦災捍患福庇邑人無涯也哉噫嘻是廟也實陳公倡之張大勅賈熙臯等應之繼此感發增修豈有窮乎昉事於萬歷十年三月僦工於萬歷十七年八月時值邑侯曾公履任廉明仁厚樂觀厥成例宜識在陳公名表福建長樂人曾公名綽湖廣衡陽人

重修南北城樓記

主事 侯廷訓 樂清

巡按御史龍湖施公以辛卯之秋奉聖天子明命戾止恒山布告約束旣詳以盡臘月遂遵趙洛而

南徧歷天雄諸郡邑明年初夏由曲周至雞澤所在貞度肅僚行所無事凡務於實不徇於虛也雞澤邑小民貧且山西屯地在焉軍民雜處前此令茲邑者率依阿取容之不暇而欲其有立也難矣周尹文定本宦家子乃知自守甫至輒銳意改修廟學及旌善申明二亭陰醫諸公宇觀視一新若夫齋舍城樓蓋亦有志而力未遑耳乃龍湖公按至治之三日謁於學而生徒以齋舍告及闕城池而門樓隘且圯爰進周尹而語之曰夫天下事皆成於能任而壞於自私其在郡邑尤易見也避嫌者樂因循而好事者多紛更紛更之人非以倖名卽以竊利民之受病多矣或者嫌於是而於事之不可已者亦因循不爲其勢必至於大壞極弊費益倍矣是避嫌之與好事均曰自私因循之與紛更均曰病民也爾其圖之適有吏農告奉例省榮者七人計得百五十金遂命以資費周尹喜躍恭事議於訓導韓軌爲齋舍在廟後者十有二額曰格致誠正修齊治平規矩準繩在明倫堂後者三額曰文會庖廩器用百爾皆具諸生用興又爲城樓者二北扁之曰拱辰志尊君也南曰迎薰志恤民也爰事鼓翼鸞飛與夫四隅角樓交峙聳瞻威遠懼邇自得設險固國之義矣乃遣典史鍾瀾陳幣致詞請記志不忘公教以詔後人予嘗預聞其事義不容辭乃卻其幣而爲之書

建東西二城門記

劉錫

嘉靖癸亥歲畿南大水雞澤災獨甚葺爾城森然巨浸中數日垣南門半圯東西兩門圯行人硬道

雞澤縣志

卷二十六

藝文

十八

筦鑰弛防幾不能邑天曹擇人以牧明年來月淫陽地山常公由名內翰奉檄來視篆恩蘇困憊力禁蠶蠹瘡痍漸瘳歲復大稔公詢謀獨斷集諸父老告曰城已惡工不可已爾諭富人各情捐長貲助料予爾六一役人三日已例應復者不與諸父老欣欣慨然曰諾越日材木石巒絡至阜聚公選上官良量工給役曰聶鍵爾修東門曰郝起東韓榮爾修西門務堅麗無華事行窳如昔曰殷濂殷大元爾緝南門暨城垣僻倪曰賈漢儒爾緝護城堤高關加舊卽再水無令敗圯曰鍵爾等好使予赤子無或刻縱予將爾罰曰典史何濱爾時巡視察諸不如程若餓寒人予告群役趨事儼部伍一日撻不迪者以狗曰莫如此玩其長之令二之日撻不迪者以狗曰莫如此媮惰三之日撻不迪者以狗曰莫如此造言解衆志人則肅肅然先期捐俸易米數斛用食餓役人曰子恫爾勞爾安子食罔子畏人則誰誰然謀始十月朔日畢役如素諸門煥如城峻如堤屹如截如唯固嗟乎愚民不可與慮始久矣矧公初下車後重災舉此大役乎乃民安堵若不經役區畫道化予於公重感擊析禦暴設險守國王公遠猷於是乎在豈徒爲水患謀公他日歷大司空以所屬居四民時地利乎何有天曹眞知人哉是役也人士口碑嘖嘖公門下弟子員請諸廣文斬予曰壽君石用告後來惟公廉頑之節起仆之才受知諸當道政教大雅卽更僕未易殫數遲公還朝當有貌公詳德政者茲其緒云

嘗謂君子留心創建豈以侈遊觀哉蓋將壯形勢聚風氣以安輯人民也縣署乃四境之望通邑人民利害係焉鷄澤縣署在城內之南縣後餘地坑塹洿下堪輿家謂前高後陷非地勢也得一山邱以聳鎮之則城邑利矣邑侯曹公萬歷壬辰夏蒞任則首重民事釐弊剔蠹清條鞭恤舖行平物價賑顛連革積役擒巨寇民獲安堵尤加意黌校鼎新堂舍崇尙理學訂正文體修城建倉講明鄉約三令五令而靡懈也諸凡有利於民者思爲之所至是睇觀縣後地之洿陷者堙之瞿然爲通邑士民造福捐貲累土創爲邱臺不煩公費不疲民力百姓歡呼踴躍子來趨事不日成之周環數仞高出丈餘植木其中四面視之屹然一雄鎮矣登斯臺也俯仰天地開拓胸襟南風薰煦有旱民解慍之思焉東日朝曦有與物皆春之趨焉西廓生明有秋月冰壺之景焉北極遙瞻有抒素戀闕之懷焉壯哉斯臺之勝也揭其石曰鳳起山詩有云鳳凰鳴矣于彼高岡蓋曹侯以鳳德深自期許而尤望於此地毓秀鍾靈賢才輩出以昭應符瑞也孰謂鷄地非鳳凰所棲耶而曹侯令名久遠弗替亦將與斯山相爲長存也已爲記

重修義倉記

賈熙載

嘗聞三代以上有荒年無荒民三代以下有荒民無荒政豈古昔盛時家給人益之哉預備故也

輓後世慮在眉睫桑土匪豫遇年稔猶可支吾一旦天災流行野無青草遂至食易子爨易骨枵腹待斃莫之奈何是古之民以君爲天而今民則以天爲天蓋至待命於天而民生始有不獲必遂者詎知不民胡國不穀胡民而不倉則又胡以穀耶余邑西浮圖店南小寨堡俱號巨鎮舊有社倉貯穀第以取支非人貧者未必領領者未必貧至秋又有以實出以虛入者行日久奸日滋遂使社倉寄空名於民命無裨也責司民牧乃不咎罪匪人第曰社倉之不足爲民天也如此以故牆垣圯壞厩舍空虛民不堪命有識者傷之我邑侯曹父母浙之常人也甫下車卽痛心民瘼時修學校築城垣百廢俱興頃聞二倉廢弛條忽新墻垣葺厩舍查二倉侵地并隙地幾何令佃戶計畝納穀鄉義士聞風助穀恐後仍簡舉良民以掌出納春出陳秋償以新酌歲豐歉以爲取數多寡倘豐年則息其二小禮則收其本大禮則收本穀之半遇荒年則盡蠲本穀而不償誌哉此法在官則爲不費洪恩在民獲免稱貸重息幸而時長和年長豐我雞民含哺鼓腹皞皞景象卽偶而旱乾水澇而陳陳相因備荒匪荒亦豈作溝壑餓殍哉詩云樂只吾子民之父母我侯以之

重修通濟橋記

劉錫

頃吾邑又殃水通濟橋圯焉鄉義士劉冕等重修就績蘄予言紀歲月按橋在邑坤方八里許陸渚水要汴水西居民半需橋急甚洺上灌遠且夥秋霖越日河便溢不可制橋功視他水偏難橋料圯

水後餘無幾何人在凶歲舉事又難劉故宦家子負氣抱義雅重鄉評協諸同志事事鄉人喜競輸所宜費不吝劉虛冊瓊列適咸陽雲山張公再尹吾邑劇弊鋤奸噓孤植弱宿蠹頓革齊氏欣欣聽令以生劉與諸人轉勵事夙夜罔懈乃八月二十二日橋告成功僅月橋凡十三柱象歲之月與閏柱十六尺象地十坤六梁十八尺象乾再九延三十步象月之日復以長料創溢河小橋一人無留行口碑稱便矣夫火伏道蕪觀國所噴乘輿濟人君子曰惠張公復尹橋遽成如待循良餘績厥施惟薄哉如聞郡西南受山潦百十注洛渠淺狹將不能爲之委平鄉居邑不忸橫亘堅隄高厚河怒溢卽隄南爲壑八角寨勸議藎停河正應北入蓮華泊泊西南有所障又不能使河不怒癸亥己巳秋叢爾城雨困水中央岌岌待潰四野森然巨浸禾稼雲沉室廬波蕩人且不樂生獨奈橋何哉獨奈橋何哉雖然橋定不可緩後來者念之

邑令朱公治河記

齊祖望

天下能利人亦能害於人者莫如水吾邑之水四利害各殊洛利多害少漳利少害多沙及舊溢皆有害無利而舊溢害小沙害大歲戊申前令姜公以舊溢道紆不利別穿渠約二里改水注之自是害遂息馮鄭諸村民稱便而沙水獨囂張不可制其害較舊溢十倍工且百倍前令旣不欲任怨任勞而被害諸人各負氣不相下甲可乙否此是彼非處同舟之勢而不共濟亦惑甚矣比來無歲不

鷄澤縣志

卷二十六

藝文

二十

水水必大且久河流所及十五村森然巨浸中自夏涉冬率四五月始涸居民不得農有流離他鄉者時山陰朱公令吾雞三載矣惻然恫之曰嗟害至是極乎吾爲令所司何事而忽弗念此於是詳府道相地高下以求水勢所必歸今年春親詣河傲漢武沉璧馬故事祀以少牢頌胙於十五村總甲刻期事事起自浮圖店因舊跡分疏三渠至城隍合流入南和計地授工人三丈諸有力之家弗得復其貧民無產者乃復渠以深一丈廣三丈爲率不如式者撻以徇令旣下乃擇謹厚役得趙逢吉命督上流陳志典命督下流諸總甲各督其十家長長督散丁典史雷君以時巡公亦間日一出體其不率者懲之勤者賜以酒民乃益奮無何工告成公曰未也浮圖之南渠尙淺恐不任水且決口存焉不疏不塞水必溢溢則浮圖一帶仍受水如故非計也皆曰諾於是諸村轉勵事夜以繼晝不半旬而畢民大悅初公將舉事謗者十七未幾十五未幾十三至是乃踴躍大呼恨遇公不早嗚呼小民不可與慮始久矣尙使公懼謗而不爲爲而中輟則吾儕亦安覩此千百世之偉績哉天下事惟智者識之勇者任之信非庸瑣輩所得與也且吾聞水之爲物不善治之則橫決而爲害善治之則蓄洩而爲利漳水多泥以灌田則畝收數倍古已有行之者北洛川居民遇歲旱輒障而溢之禾得不稿又近今已試之效也水害除則水利可興當亦異日所次第及者公之惠吾雞厥未量哉厥未量哉按公諱冕字寧文號存蓼浙江山陰人工詩能文庚子中副車遊京師聲名籍甚己卯授

鷄澤令承前人嚴厲之餘諸政尙寬小民怙恃公如慈父母茲舉獨毅然不撓固知天下之智勇人皆天下之仁人也夫典史雷君佐字公輔陝西渭南人敦厚信義有吏才奉是役尤銳功不可泯故並志焉

移建奎樓記

李駿聲

奎爲西方之宿一十六星屈曲相鈎如文章之畫故主文明在漢濱炳照天章與東壁文昌相映東壁爲天下圖書之府而文昌爲文章之司命載在祀典祭以丁丁火也亦文明象也而郡國建祠皆從孔廟豈非以吾夫子爲道學之宗奎與文昌胥以大發其光華也哉三韓祖公簡齋來尹茲邑下車後剔弊釐姦諸廢俱舉且痛學校之榛蕪也慨然有振興之志作爲文章懇摯詳切遍諭鷄人以鼎新奎閣之意因與文昌祠並舉道之將興端在今日乎然所以議奎閣者將扶其頽補其罅而葺其舊乎曰非也孔廟前地不減十畝闊大廣平容畜無外眞風氣之藪哉故議遷於南北拱孔廟夫南爲離地離爲火象火爲文明祀奎於斯斯爲得位此日之文運將必有大發其光華者矣余言必有驗也

重修文廟記

齊 崑

天下關乎風化之盛衰政治之得失者無過於學校蓋風化政治之本也今日學校遍天下爲有司

鷄澤縣志

卷二十六

藝文

二十一

者祇知朔望有拜謁春秋兩祭而外他無餘事至若棟折榱崩牆垣傾圮曾無有過問焉者抑知誰司教養而聽其若是耶予邑學校中間興廢不一至康熙壬寅歲垂殘特甚署縣事曲安令崔公慨然重修自正殿兩廡以及櫺星門泮池煥然一新而明倫堂泮無及肩之牆尊經閣前成四達之道邑人士過之猶咨嗟太息仰崔公之勳而惜其未終再越歲曲安俞公來署鷄篆深念大荒之後輕刑罰緩徵輸給種勸農善政難以枚舉而尤加意於學校下車之日卽召匠計工捐俸凡崔公之未終其事者罔不刻期告成獨念學宮之垂殘已久宰斯邑者甚多皆不知從事乃崔公始之俞公繼之兩公同爲五日京兆尹其惓惓莫釋先後一轍謂非深契本源之所在而究心學校者乎昔歐陽子云急有司所不責者可謂有志之士矣請以是說爲兩公誌云崔公諱湄字季眉遼東廣寧人俞公諱斌字學林江西南昌人

重修開明寺記

齊淑倫

自古瑰異之士負蹕躒不羈之才往往鄙夷八藏屏棄三篋如范縝張商英操戈元門詎不以爲羣疑立破獨砥狂瀾然余聞紫陽夫子觀五祖六祖像咨嗟稱異伊川亦謂佛是西域賢者吾儒覃思六籍固不當爲因果所惑若必欲悉去象教頓絕雙林恐葱嶺蓮河亦非盡屬子虛也蓋自大雄氏化被東垂弘濟萬品普天率土並薦馨香倘花宮零落棟宇傾圮鐘梵交寂松月無輝其何以大轉

法輪俾疲極之衆盡登般若之航乎吾邑浮圖鎮河流環抱烟火萬家有古刹道場曰開明寺創自
有唐明萬歷中葉重修規撫彌廓閱今已八十年餘珠宮紺殿光華剝蝕寒烟淒草鶴唳碑橫康熙
辛丑歲更值封姨馮怒石走沙飛簷楹摧折虹螭震蕩豈金仙遭厄丈六身將復化一莖草耶抑領
袖無人止知世間財而不知七聖財耶幸有鄉士十數衆盛舉先倡不惜黃金布地諸檀越亦踴躍
從事共作喜捨蘭陀鳩工壬寅歲事癸卯五閱月朱甍如故繡椽重新璀璨琳琅窈窕窳窳從此振
雷霆之法鼓整日月之慈鏡香花貝葉之盛甲於一邑厥功偉哉余賦質庸鈍內典未閑率爾濡毫
聊紀歲月至捐資福應余雅不善諛亦恐與諸善信營建本意柄鑿方員不相入故置弗道或曰鎮
以浮圖名意昔有寶塔峻嶒上摩青霄如慈恩諸名勝乎然滄桑幾變遺蹤莫考余不敢妄說郢書
姑闕所疑以俟後之博古者

重修文廟記

撫吉 李開葉 福清

雍正辛亥冬杪廬州景侯蒞茲土謁廟目覩頽頽卽欲修葺以甫下車未遑趨事越癸丑政事修舉
遂捐清俸鳩工治材各僚佐暨合邑紳士咸協力以勤其事費有弗贍保又獨成之自大成殿啟聖
祠而兩廡泮池戟門奎星樓名宦鄉賢祠圯者建缺者增隘者廣卑者崇規模宏敞瞻視輝煌爲諸
邑冠夫鷄邑風土樸茂士知向學景侯又有道者也以道爲教士更蒸蒸而復於古誠能相與弗怠

鷄澤縣志

卷二十六

藝文

二十二

而俟其成功維茲髦士夫豈徒擅公卿之選而稱稽古之榮哉蓋將佩奉前烈之遺矩闡然以自修
也然余又聞景侯爲政能化其民薄習以革廉讓以興居位五年吏習民安訟獄衰息而俗益以長
厚則其所觀於學校之成者當又不徒在膠庠之士矣景侯諱一元字健伯號涑溪山西安邑人雍
正庚戌進士工始於癸丑冬月落成於甲寅七月邑之大夫士徵余記之

新建文昌閣記

御史 沈景瀾 元和

政無論大小得人乃就理官無論崇卑敬事始盡職古之人建豐功著偉烈不盡高官大爵者或位
下才高亦罔敢厚自菲薄乃盡心王事大有樹立固朝廷之得其人亦其人不以高卑豐約異其操
蓋往往然也我國家創業垂統締造百有餘年聖聖相承重熙累洽薄海內外無一事不合其宜無
一人不得其所苟官非其人曠其職烏克臻此余自雍正癸丑叨列館職奉 命在怡親王書房
課讀與大興選拔明經孟仁尤君同居朱邸西席晦明風雨數晨夕者有日知尤君行潔品端才優
學邃處旣爲正人出必爲名宦未幾以孝廉方正徵召補鷄澤教諭余謂尤君以授經親藩者授受
諸生其必綽有可觀與尋常供職者殊有間丁卯六月尤君以公務來京師相晤握手揖余而言曰
某學官也在學言學鷄邑學宮邑侯已次第修舉惟文昌祠不戒於火毀燼矣學博士不董其事將
誰諉與因與前邑侯閻中李公偕闔邑紳士鳩工庀材且拓其地易祠爲閣巍煥輝煌神其憑式巽

方鼎峙文明高聳將有望於科甲之繇縣官斯上者與有榮施工未竟李侯以憂去今明府光州吳公來令斯邑勤於督修遂落成乞公一言以紀其事用垂不朽余聞而樂之所謂良有司必有真政績真先生必有真教化今之令長大都校簿書勤催科其於教養之事或不及講李吳二侯既與廣文共興學校而紳士輩復樂輸而協修之斯邑之官箴士習洵美善哉斯舉也

朝廷爲得人官與士爲敬事鷄邑之振拔興起將不獨士氣爲然也余前忝操史筆不敢以不文辭是爲記

開明寺重修二殿並創建關岳兩神祠記

施夢麟

吾儒喜談節義崇尚忠貞於佛氏之學謂清淨寂滅無與於綱常名教之大恒略而弗詳夫帝王御世有禮樂以化君子卽有刑政以懲小人至不得已而以福善禍淫迪吉從凶之理以曉之凡所以去不善而卽於善也佛氏之學亦何獨不然彼其來自西土也著爲佛書垂爲釋典設爲法像倡爲死生輪迴因果報應之說夫其盡屬子虛哉大界三千悉歸淨土善悟者自得之耳吾鄉之有開明寺也正殿塑釋伽牟尼像粧嚴如如無制無得其俟善悟者自得之乎奈殿宇傾圮金碧剝落瞻拜者咸惜之鄉善士等慨然興修廢志捐金輸粟鳩工庀材三閱月而工克竣嗚呼盛矣然事有宜於古而不宜於今者如東廡之祀我伏魔帝也於昔爲是於今則否帝旣克配上帝矣而猶然端冕垂

旒拱列佛氏之側尊帝適以褻帝也盍起而易諸爰於山門內居中面搗構堂屋而口祝之第寺有兩廡西達摩而東則帝也旣有專祠此座不容虛設而又慮步武乏人躋斯位者或難其任也考謚法大功不成曰繆古繆與穆通用漢謚帝爲壯繆宋謚岳斬王爲武穆蓋其事同其忠同故所謚無不同也雖隆封不同而由王而帝徽稱正未艾也遂肖王之像而禮祀其中帝與王後先輝映矣其配以增福財神何亦曰錫我福畀我財而使樂善好施者常享福祿於無窮也祀典其光矣乎抑吾聞之見像作福聞風興起茲殿宇輝煌俾登斯堂者於萬劫苦海中回頭是岸而知佛法之大於一手撐天時九死不移而識君父之尊以成善果植以倫常胥在是矣故爲之記而鐫諸石

新建鳳輝書院記

邑令 王光燮 武進

文章者華國之器士人伏處誦讀謳吟一室之中特如蚓竅蠅聲聞者不足震耳及其光華發越藻耀高騫足以鼓吹休明羽儀王國又若朝陽鳴鳳見者莫不覽德輝焉要必棲息有其地馴習有其時而後能和其聲以鳴盛則書院之設關於造士者非淺鮮矣廣武爲畿輔要區郡城擘畫書院最稱勝地邇年曲清等屬皆有建立惟雞闕然余以庚午秋視事茲土採風問俗觀其所爲文非無雞羣鶴立之姿尙少實大聲宏之槩所以拘繫樊籠未得高飛而遠舉者蓋自同年賀商賢領丙辰鄉薦後十餘年鹿鳴絕響竊思有以振勵之越明年乃卽縣治東義學買民地建其基葺舊營新豎門

垣增室廡列堂階經始於辛未四月落成於癸酉五月雖未能美輪美奐鳥革翬飛亦復攸躋攸寧
庭楹噲正顏曰鳳輝書院蓋因後鳳起名山而冀夫覽輝以來下也既竣事聚邑之秀者肄業其中
公務之暇與諸生論文講藝且揖而進之曰夫所謂文以載道言爲心聲者豈惟是雕虫小伎角雌
霓之細兔園舊冊擅鷄塲之勝哉將使文成五采光燦九苞鬱爲鸞鳳之音以和鳴國家之盛也癸
酉杜子學詩登賢書其一鳴驚人之兆乎多士益精其業績其修則光遠而自他有耀由是翱翔千
仞干青雲而直上萬里鵬程扶搖立致矣豈徒鴻漸鸚薦之足多乎哉卷阿之章曰鳳凰于飛翩翩
其羽又曰鳳凰鳴矣于彼高岡夫媚于天子媚于庶人而皆起義於鳳則他日致君澤民之業於是
乎在而鳳鳥時見占曰世在

明願多士雖雖嗜嗜矢歌謠吉以對揚

天子之休命勗哉無怠諸生皆唯唯爰爲鐫諸石以記

新濬興隆渠碑記

教諭 尤淑孝 大興

鷄澤縣爲畿南僻邑然其名最古春秋時會盟地也勝國時邑之東南鄉十五里曰舊城營建開開
渠引溢水灌城濠近河畎畝各濬小溝溉其禾稼民賴以濟因水來自巽方遂名之曰文明河而邑
之西亦有閘自金龍口引牛尾河之水灌田以洩於城河東西二水環繞城隍俗呼其城爲二龍戲

鷄澤縣志

卷二十六

藝文

二十四

珠三百年來科第綿綿士民殷富風水之說容或有之明末漳河潰決舊城闌圯河淤民失其利康
熙年間西閘亦壞城濠涸廢幾數十年於此矣乾隆甲子

詔修畿輔水利前邑侯李公從民請欲復文明舊河而侵種河身者百計阻之不獲已循溢河而北
於邑之正東邢家隄建閘一座名曰利民未幾李公去任民力未齊數年來渠不成閘幾廢庚午七
月毘陵王公來蒞茲土甫下車徧詢利弊興革必果知斯閘爲利之大者思開渠續成之往來相度
卓然排衆議任怨勞捐清俸改官道爲渠毋傷民田綿亘十四里既廣且深直達於城河沿渠植柳
防其衝潰民且借以爲利也閘有啟閉渠有蓄洩中設橋以便民設偏閘以達小溝計渠南北可灌
田數百頃農旣隙矣按畝計夫按夫給食俟坐臥河干者不十餘日而河渠溝洫次第以告成俟向
宦東粵兩治海疆固才大而識遠志堅而量宏旣己子視其民而民亦若趨父事者故不令而行不
疾而速若此渠成於辛未四月壬申春又捐貲復建金龍西閘於是邑之形勢乃復其舊是年特開
萬壽恩科郡廩生杜君學詩獲雋副車癸酉遂登賢書張君顯又武闈中式余未知是渠較向所謂
文明河果何若而固已有其效矣堪輿家云天下之水皆東南流反是則吉尤若茲將鷄之士與民
不特蓋藏日富而人文之蔚起科甲之鼎新更可操左券已因顏其渠曰興隆是役也侯不自以爲
功每偕予及汛司李君共襄之予旣樂觀厥成因不避固陋歷叙目擊之巔末有如此者是爲記

邑侯王父師治沙碑記

杜學詩

鷄以澤名窪下區也溢東洛西交流境內夏秋雨潦泛溢爲害而資其灌溉則厥利維均其有害無利者莫若沙蓋其浮沙壞田非溢洛水肥能沃地可比故治之亦較難於他水比來沙之爲害更烈自雍正八年上流決永年界貽害我邑魯高以北水勢漫衍縱橫一二十里糧田泊成巨浸堵築迄無成功每當水發之時栢枝東柳等村一望漭漭高低阡陌變爲千頃汪洋必待秋水盡涸稍種二麥爲生計數村居民辛苦墊隘思欲灑澹之而不得癸酉重九余自京應試還友人談及秋雨霪潦洶溢諸水皆溢惟沙帖然余備詢其故得我王父師治沙始末不禁喟然曰河西數村困於沙水者凡二十年我父師可謂駕慈航者矣彼沙河土散而水猛散故易淤猛故易汜康熙間邑侯朱公於正河外設二支河以殺其勢源流分合前進士齊東柳所撰碑文言之最悉不復贅夫鑿溝渠以利導於先前人之事也而議疏築以補救於繼後人之責也補救無術雖有溝渠不能歷久無壅下流壅則上流潰必然之勢耳論者不究人事而歸諸天意過矣我父師以濟川長材來治茲土蒞任後百廢俱興旣而聞沙水爲患毅然以拯溺爲己任親勘河形謂大工不能以一日理須先理正河使水歸故道然後可再理支河爰率吏民興工挑挖不數旬而告竣復爲文祭告備誠敬河伯亦遂效靈洋洋括括卒無狂瀾然則西鄉數萬畝桑田不致變爲滄海與數千口生靈不至沒爲魚鼈者皆

鷄澤縣志

卷二十六

藝文

二十五

我父師之賜也以視朱公之明德誠足後先輝映而沙水將與洶溢同其利矣乎鄉人樂我父師之德足以生死而肉骨之也屬余爲文以記之因述其事壽諸石以垂不朽且以告後來父母

殷仲子入鄉賢祠記

王光燮

鷄澤鄉賢祠創於前明正德間教諭李一寧作記蓋自有唐馮郭二公暨自劉趙諸賢下得人者實難其人余嘗覽通志訪流傳見夫超前絕後足稱鄉賢不愧者得殷仲子焉夫子仲行事明經郝元直永年中太史兩傳言之詳矣想其痛父仇莫報國運將傾山中作詩見志論妻絕食謀諸邑衆北向勤王意氣可爲壯哉乃遭時不偶卒死僞賊之手嗚呼窮矣其兄宗山曰澄之氣節孝友當時聞見者猶及慨歎久則同草木盡余竊悲其意亟爲詳請入鄉賢祠且因其族殷傑遺宅改建專祠擇族曾孫殷尙質奉祀之庶昭昭大節表見於世歷久而名益顯云

四忠祠記

王光燮

鷄澤死忠抗節煌煌竹帛者莫若殷仲子余旣詳請列於鄉賢建有專祠矣而又以教諭死節者有若胡永亨以訓導死節者有若崔世勳馬騰龍騰蛟與仲子同遇害者也以縣尉死節者有若范蘭茂蘭茂職最卑而死更烈呼二子俱殉焉雍正間詔天下建忠義祠四人外籍不與又以官卑不得入名宦祠嗟乎忠魂長留泉下而祠典闕如豈我朝褒錄幽忠意哉且夫運當傾否而殉難諸臣

視死如歸徒供兵燹之一燼卽緝半通居末秩者亦不敢苟且求活而見危授命激烈動人斯又死節之絕奇者矣然而干戈擾攘中死節而名不傳者何可勝道吾猶幸四人之得列於邑志百年來一展卷而生氣猶凜凜楮端也因戟門內構庭一間爲四忠祠與仲子祠輝映春秋祀之庶慰當年死忠苦志且立懦廉頑俾後世有所興起乎是爲記

重修文廟碑記

邑令 王錦林 蕭山

古者制詔州縣立學非惟崇德報功亦僻雍園橋之遺意也鄒魯之間其天性多文學難固古之衛墟爲地不遠而寢近俗敦本業黜浮華祗生徒濟濟儒術豈其餘風猶近古歟抑其沐浴於詩書之澤於不衰也錦林來宰是邦朔望虔謁目擊夫殿宇傾圮垣閉頽廢非獨不足以耀觀瞻亦幾不可以蔽風雨慨然於前者之既去後者之未來錦林適承其乏而將誰責耶又以家世本寒素而薄宦所入僅足以供米鹽齷齪之需未克獨肩其任遲之期年而民歎於歲又遲之期年而民荒於潦幸上游不以錦林爲不才伸得久於其任皇仁誕播物阜民安螟蟲水旱不爲災井里之元氣得稍稍以復爰集彼都人士而相與謀之僉以爲可乃布之算而歛其資擇之人以董其事百爾器備並手偕作錦林以時來往其間工善吏勤晝夜展力舊制大成殿基亦較卑俯今爲高三尺有奇堂構門廡黝垩丹漆舉如法越以歲時向之所爲傾圮者今奐然焉向之所謂頽廢者今巋然焉噫錦林

鷄澤縣志

卷二十六

藝文

二十六

之尸位素餐十年於茲矣於教化之源風俗之本誠有志而未逮並所謂屈力殫慮祇順德意亦捫心自慚若夫假官借師苟具文書古人之所譏或庶幾其免歟是役也始於乾隆二十九年甲申十月卒事於次年乙酉之季秋將舉舍菜禮且有日因勒石以紀其始末非敢自尸其功亦以幸數年來之歉然於中者夙願得以償而彼都人士之敦本業黜浮華果足以勇義好善於無窮也

重修城隍廟碑記

邑令 王錦林 蕭山

城隍之有神不載於經籍然王公設險繫諸易傳召伯營謝播之雅歌周書之宅洛卜灑庶殷丕作嗣且肇稱殷禮咸秩無文春秋書築城浚池者不一而左氏傳勇夫重閉之戒尤爲深切而著明則城隍之繫於都邑綦重矣所係者重則所以主之者必神蓋河山帶礪鞏固金湯非有靈爽以憑之安保千百年不堙而不圯昔人謂天地間無物無鬼神正此類爾鷄澤四塞之邑也盟臺峙乎東鉅鹿界乎西魏博栢鄉接遼乎南北悉爲古戰爭之地城池較他邑爲要害則神之憑之者亦當較他邑尤英靈而百餘年來抱鼓不驚飛鴻畢集四界之崎嶇險阻漠然徒見山高而水清物阜民康井里恬熙於畊鑿雖

聖朝德化之淪浹亦未必非神有以陰護而默庇之也記有之能禦大災捍大患有功德於民者必祀之則鷄邑

城隍神之崇祀也豈顧問哉顧立廟雖久而屢修屢壞遠莫可稽乾隆丙子余來茲土朔望詣謁見夫垣頽瓦斷棟折榱崩第蒞任伊始民事繁冗未暇致力於鬼神越數年墾荒濬河興學設教諸務漸次稍舉有城隍廟亦日加傾敗竟有不能終朝之虞乃集士民之好義者勸諭踴躍余簡點虛橐得錢六萬有奇以爲倡合城鄉義助共銀七百兩零鳩工庀材經始於庚辰三月落成於辛巳三月或葺或構中成殿東西成廡前成臺臺之外成坊殿以後爲內寢其旁爲橫舍與黃冠以棲息殿寢兩廡之神像悉加繪塑冠服之莊嚴與榱桷之漆丹相輝映而廟乃煥然一新夫

城隍之神於民也水旱疾疫可以禳金革兵戈有所蔽捍患禦災胥於是賴蓋與荒誕之仙神大相逕庭昔狄梁公之安撫江南也毀淫祠千有餘所夫無益於民者巡察者宜毀之則有功德於民者守土者固亦自修之也然則是舉也寧得與金碧輝煌以奉無名之土木者同年而共語也耶第余也分斯民膏脂而爲一邑之父母神亦享斯民牡牢而作一方之保障受若直而怠若事余固兢兢不敢也神之聰明正直諒亦必有同心乎余願與神交矢之併與後之蒞茲土者並矢之則斯廟之嗣而葺更自可以永永弗壞矣

碑

劉公德政碑

胡仲昇

夫令尹之官出宰百里上應列宿而撫字下民者也是以得人則民受厥福失人則民罹其殃故得失至重責任非輕其於立德政宣仁化絃歌湧沸輿頌交騰間有弗從令者不董之以威乃道之以德齊之以禮可謂得為政之本矣如宓賤之鳴琴尹何之製錦誠古之良吏善治斯民者哉後世繼踵而行者今豈無人鷄澤縣尹劉公明善字曰德元大名人也詩禮故家簪纓右族始襲祖榮至元己卯歲來宰是邑是歲七月間霖雨久降沙洛泛漲焦佐等村河口衝決溺損民田公顧水害即募夫併功修築長堤至今賴之慕家堡富民被劫尉司捕寇不獲公因勸課行次柳下見遊惰之人冀孫兒等素無生理衣食饒足疑其為寇遂縛之迄得其情至元六年歲頗稔熟上司發下官馬令民喂養公立法定上中下三等有物之家人戶驗物力大小科派粟豆斗數既定明文簿再無改易不致作弊威州茶商隱匿販賣茶課虧損公洞悉其情不動聲色即得所匿茶貨立辦課額其神明慈惠膾炙人口三年者績去祀名宦

霍公惠政碑

教授邢獻臣

鷄澤縣志

卷二十六

藝文

二十八

惠者濟人之雅稱政者為治之大體非歷鍊老成之人有實效及民者焉得若是之美名民之受戴於上非深受其賜者亦焉得區表若是之盛績哉鷄澤尹霍公從仕之明年前俸吏邑人張柔趙居仁奉幣走郡請予言公自下車來首謁先聖顧廟宇摧圮捐俸鼎新以絃誦聲沉乃拔俊秀七十人入齋肄業刻自砥礪以迄有成又稽學田不敷所需乃節丁宴費歲省租三十石命工創造禮器復選經明行修士訓社學三十八所霖雨之際親詣鄉社勸農植桑生成者三十八萬餘株民皆感化向善盜賊屏息造木牌十面名曰善理遇有詞訟不係重判送社長以理論解二年之間絕無詞訟大凡軍儲暨需和買和顧雜泛差役依驗人丁物力均科不許那僭往歲縣設里正三十名人甚病之公止存三之一大蘇民力上年糶買常平粟豆一千七百餘石除設法出糶為見饑乏食出借於民者六百餘石至秋止均元價昔逃民站李成等三十五戶風聞來歸即以原拋事產給付寧業河南盜賊蠶起奉檄重修城垣募民趨事不施鞭朴厥功告成仍起門三座四圍濬池水兩岸植柳五千株其遺惠在民如此祀名宦

邵公去思碑

李一寧

雞澤前尹商州邵錦穎州丁冠相繼為政皆既去民為丁公立去思碑而弗及邵焉君子惜之皇帝十有二年大邦伯張公以名侍御來守廣平越明年百廢俱修乃綜核名實以風勵僚屬嘗念曰邵

錦之政治於民民至今便之丁冠之政吾目所擊始弗若也而百姓則略邵而不錄何哉遂移檄大尹車公棠使磨去其書丁者而書其邵之賢命教諭李一寧記之曰嗟夫天下之善有潛而弗彰與似而弗真者衆人昧君子識焉蓋鄉人皆好不如善者好之而一鄉皆稱愿人則又德之賊也然惟有德而後識其所以爲潛者似者之微有位而後可以操予之奪之之柄故風化善惡之原上之人爲之也雞澤屬廣平爲最小其地礪其俗儉其民朴且直視他邑爲易治考夫邵公之治也因俗損益而不易以新因時催科而不併以急而又董之以莊敬守之以廉謹不易以新則無以駭民之耳目不併以急則無以來已之聲譽是故其善潛潛則人弗知弗知則弗思弗思則弗碑也若夫丁之治也則不然蓋迹勤平治民而志專乎彰已其迹勤則民懷之而不其實其志專則民困之而不知其似是故其善彰彰則人感感則思思則碑之所以作也太守公之書此也慨然而不疑去彼也斷然而不恤知之真也書之以示勸去之以示懲位之隆也所以然者皆爲民也今夫守之官於民爲最切而令之賢否民之休戚關焉太守之舉此則凡得於觀感者孰不曰善而潛雖久而益彰善而似雖影而弗久孰不勉其所謂潛而去其所謂似哉由是而知民生之福未可量也吾獨惜邵公之善不幸而不遇太守之賢表章之典未見於在任之時又慨丁公之似而暫隸太守之屬黜罰之法第行於去任之後則夫二人者之命又何如也矧善大於邵而似加於丁者所遭之幸不幸可知也

雞澤縣志

卷二十六

藝文

二十九

雖然善而似猶愈於爲非去而思猶勝於詬罵然非識微之君子精藻鑑以別之則丁公者亦世之所謂善人也吁可不畏哉一寧教職也不敢不勉敬述善否損益以爲守令者告且以解衆人之惑是固太守公之意亦民之心也

銀公去思碑

檢討 孫紹先 晉

雞澤民思其令君之去也碑於縣治題曰正德己巳天子命太原進士銀鏡本明氏來令我雞澤越癸酉考三載績擢戶部主事去惟令君之德實惠我心我民實心思令君弗忘至於子孫亦永無斃乃歌曰令君之來只活我援我令君之去只奪我捐我令君復來只旬我宣我載告於史氏曰維敝邑土瘠且狹民用貧盜且滋自令君之一歲也藝歛經費佚使時役邑儲不他發泛需溢於他不我逮吏罔賄殍乃蘇流徙始來剽人釋荷兵於田自令君之再歲也民罔遊生作用恒婦蠶有桑豪貴不私鬻獄訟平家室時學校以興成人及小子悉有造自令君之三歲也庾廩實戎器閑郛郭以完盜是用禦不侵及於鄰封人亦克用康以又矧惟我父老子弟食令君之德敢用請大書以昭我令君罔極史氏孫紹先曰郡縣至於今敝極矣民歲或十數訟吏罔不曰無良虐我吏三載更置至一再亦罔不曰無良讐我夫孰云其然去遺思維令良哉思弗諉爾去維民良哉銘曰孰謂爾民良讐或訟之孰謂爾民匪良思或詠之爾曷讐維令之尤爾曷思惟令之宜匪爾則有知皇實鑒斯我銘

爾碑不於其去於其來嗚呼來承祇若思

重修關岳合祀廟碑記

邑令 陳同楨

天地無終窮也人生其間視之猶須臾耳自古國家存亡終始數百年其逾於須臾無幾也而道德仁義忠孝名節凡人之所以爲人者則貫天地而無終敝故不得以彼之暫奪此之常昔者漢之季世曹魏竊柄而孫吳助虐宋之中葉金狄猖夏而賊檜內蠹當時忠憤之士抗死不顧比比而

關壯繆
岳忠武

兩聖之事爲尤烈此貫天地不敝之道也兩聖不計成敗利鈍誓削奸虜與武侯桓侯及德遠良臣諸先烈同仇敵愾以恢張漢室重奠宋社其崇正黜邪尊夏攘夷精忠浩然之氣實足以振奮當時雖功業未竟陡遭禍變要之忠肝義膽炳若日星固與天地相爲終始足爲吾四萬萬同胞所奉爲圭臬者也民國肇造政府有慨於老大病夫之國處弱肉強食之秋苟且圖存殷憂堪慮環顧軍民雖有保守之懷未勵義勇之志思有以崇禮先哲振起頽靡庶可以安內攘外尊我主權是以於民國元年冬季行政會議僉以謂我中華之發強剛毅矢忠報國歷經千磨百折而素志不渝者厥爲 關壯繆
岳忠武 兩聖足以表率人倫光昭寰海於是政府有訓令各省縣舉行 關岳合祀之令典鷄邑舊有 關廟位於治北基勢宏敞殿宇巍然當經遵令設龕合祀惟年久失修摧拆堪虞民國十六年春仲前縣長時公春升謁廟致祭日覩心惕遂動增修之念撥款國幣四百八十元以助

鷄澤縣志

卷二十六

藝文

三十

盛舉並由廟社董事國子監太學生周君樹楠暨建設局長劉君國昌紅卍字會分會長史君東昇等捐募鉅貲鳩工庀材諏吉興修肇始於民國二十五年九月告竣迄今數載廟貌壯嚴丹碧煥采衆議以爲功不可泯宜伐石泐碑以示來茲議成乃屬余叙其顛末余維政府於開國之際諄諄焉以合祀訓誥時公蒞任之後汲汲焉以修廟爲亟蓋皆所以崇拜忠義淬厲末俗俾軍民各界瞻仰清高發憤爲雄以鞏固我邦家之至意其所補豈淺鮮哉因不揣謏陋援筆而爲之記

誌表

唐驍騎尉毛公藻墓誌銘

公諱藻字行斌家本榮陽先自顓頊遂因仕歷擇里漳濱故爲雞澤人矣曾祖買齊儀同三司常山太守祖寧隋湖州湖陽縣令又任太府寺主簿父鄉釋褐洛州宜陽縣令尹屬隋末失道皇家啟運西瞻陵谷尙風生於二嶠東望鼎門猶湯沸於三水當卽遠送誠歎仍展勳勞蒙授上儀同尋除熊州司倉參軍事風高千里資我弼諧俄而又除晉州冀氏縣令公以乘躡懿範抗籍芳踪志烈風霜情急仁義輕雕蟲小篆之技重捐身奉國之功定王充於沸洛滅寶德於波漳蒙授朝散大夫淺降爲驍騎尉旣而隨親解綬遷影歸田寬恕居懷追遊在意堂客恒滿召稽阮而爲儔尊酒不空酌聖賢而高興宜應保茲嘉慶享此餘生而乃福善無徵犯朝露而成疾夢楹俄反隨夜風而不歸春秋七十有二以咸亨四年二月二十七日終於私第以上元二年歲次乙亥二月己卯朔十日甲申遷窆於城西八里之平原禮也惟公立性疎放不拘名檢方當抑揚時裕領袖人倫何期壯志亦彫英姿遽沒子義成義同等感過庭之訓痛甚崩心想陟帖之恩悲溼泣血恐桑田變易巖谷遷移敬勒芳猷庶傳不朽其詞曰顓頊開源臯陶構緒門多俊傑代有文武葺卽演詩遂使威楚雲布簪猷星羅台輔偃蹇疎放志在追遊旣輕軒冕不重王侯夷齊作侶嵇阮爲儔滿堂嘲謔盃罇獻酬一生易盡百年難駐奄逐夜風俄隨朝露行旅傷感親友追慕隧道已通佳城將措黃泉路遠白馬悲深日慘春暖雲結郊陰草懸露泣樹引風吟式鐫瑛采永播芳音

唐定州望都主簿韓公固文墓

君諱固文字南金銘州雞澤縣人也詳夫四國疏封系崇基於武穆七雄稱主開霸業於韓原漢帝爲壇卽備將軍之命都姬入肆方知隱士之名尙書則寶劍昇朝大夫則玉環流鄭奕葉光寵其在茲乎曾起齊幽州漁陽縣令祖韶隋并州錄事參軍父士行唐明經擢第爲儒林郎君積慶隆家承長者之餘論鄰幾入室追亞聖之高蹤窮學海之源淵剪祠林之浮藻解褐爲陝州芮城縣尉考滿調補滄州鹽山縣尉遷定州望都縣主簿釋茲黃綬緝彼朱鈞愛昇一進之階卽冠六曹之首澡身浴德雪白冰清當懷撫下之心用答太平之化以儀鳳二年臘月十九日年五十有五卒於官長安三年十月十二日祔葬於縣城西北十有五里之先塋銘曰配邢晉兮列周藩跨燕趙兮據韓原稱三傑兮重一言英威滅兮圖線存挺高材兮庇深根籠祀梓兮播蘭蕙鴻之漸兮歲之春佐銅墨兮歷寒暄時不在來隙駒奔而不憇遺喪龍蹲有孫謀兮翼子銘祖德於泉門

明湖廣布政司右參議劉公誠墓碑銘

布政使 何喬新 旣江

嗚呼天之降才鍾其粹美者固鮮能踐修以盡其才者尤鮮才美矣踐修力矣而享年不永不底於大成是則有命焉故吾於亡友劉君每咨嗟痛悼而歸之命也君諱誠字敬之世家廣平之鷄澤曾祖諱春祖諱辛再世不仕考諱芳東平州學訓導累增秀府長史母秦氏累封宜人君賦質明粹自幼知向學不煩督勸弱冠登進士第擢翰林院檢討輔導德王尋陞秀王府左長史從王之國賜四品章服王薨改寧國府同知仍食正四品俸在郡有賢聲遷湖廣布政司右叅議後卒葬於里之先塋 銘曰

明提舉郝公理墓表

劉錫

幼子爲鄉校弟子員竊聞諸朋遊長談鄉先達高人物則曰郝公天賦郝公天賦隆慶元年公子起漁卒起漁子九霄經從子學舉子業兩狀子蘄表始詳知公世公眞高人物哉公名理字天賦別號仁菴其先山西介休縣人七世祖仲良永樂年間遷雞澤生從諒從諒生士謙士謙生珣珣生鑑公大父也以齒德右鄉燕鑑生志江成化四年己巳志江生公公生而樸淳岐嶷見者知非恒人家計素歎篤志幼學不以貧撓學殖日益富鄉之賢子弟多從公遊沁源尹郭先生潤解州武王君汲石

鷄澤縣志

卷二十六

藝文

三十二

州學正趙君有爲皆公門下高弟云宏治十七年甲子公領順天鄉薦初第時着新絹製送客稗販行鹿角車觸衣汗垂壞公不色愠販體知是公愧悔再夕死人感異之三戰南宮竟以數北正德七年奉檄天曹提舉雲南黑鹽井課此司實脂膏林公澡身嚴法略不自潤鹽商甲雅以貲自雄擬贖公數百金假靈茗款公聞之赫然怒曰此駟也乃欲貨吾堂階耶吾且撻此駟死甲動勦退用是法行滋厲課報如額部人異公如神司政暇則集滇士論文析義不倦嘉靖乙卯年間滇人劉君昺分我庠教士偶說書舉與義曰此爾鄉先達郝提舉公說予私淑諸人耳公教滇士深且遠如此嗟乎公眞高人物哉正德十三年戊寅公考終命壽五十元室胡智女繼室高財富女皆南和人子男六長起莘娶孟氏生子九思九韶九春九尙次起渭娶徐氏生子九卿次起陽娶崔女生子九鶴次起嵩娶王氏生子九一九德次起巖娶柴氏繼孫氏生子九疇九仞俱胡出次起漁娶趙氏生子九霄九叙女一適張尙魁與起漁高出見曾孫男十四女十二一蓋多後矣天固相高人哉予於公平重感

明紹興知府劉公錫墓誌銘

舉人 聶鶴齡 曲周

隆慶辛未十月二十八日吾友鈍菴先生劉公考終正寢閱二日予總服往哭於家己子孟源卜葬於壬申四月十七日乃奉庠士柴子熠狀來問銘於予悲夫予安忍銘吾友也公諱錫字德純鈍菴

其號其先進之上黨人也永樂中徙民實畿甸行四者始遷於雞澤四生聚聚生兩雨生仲良良生雷配李氏生公公生而穎敏幼治朱氏詩即大明習弱冠舉丙午鄉薦明年登進士選入翰林讀中秘書己酉晉位御史封其父如己官母封太儒人公吏事精明持法嚴峻按山東以澄清自誓貪墨豪滑望風屏息時太宰李奉詔如京所過處臺省官督就謁途次公獨不往李啣之至部即出公守紹興越俗嫁女奩具過豐往往有因而傾產者以故諸生女者懼費多不舉公始至即立嫁娶禮儀定額縣示之更設厲禁有犯者即如所禁罪之不少貸於是故俗盡革仁施於無疆矣郡故多貴官其家人率席勢縱恣公一以法裁之或有所干請又多不許以故吏民畏愛而士大夫間有不悅者軍叛入寇公日夜戒嚴爲戰守備寇至而公率將士追擊於桃園村斬首虜數十人生擒三人獲械器數百件紀功者以聞天子嘉之給賞白金二十兩始工部上書趙文華行禱海神劾奏上書張經都御史李天寵論死西市時又以監督軍務至大索賄賂諸司凜凜畏罪問遺者接踵或以謂公公太息曰奈何媮民膏以媚權貴也即獲罪吾甘之矣竟弗予趙果大怒求摘公罪無由居無何寇復至會御史錢鯨慈谿人也携眷歸道經境內遇賊被害趙即劾奏交通外寇致殺憲臣詔逮公下獄禍且不測公上疏論辯天子廉公寃事下部議法司自其誣即議開釋會讐公者搆爲蜚語竟謫戍雁門公携二僕如伍諸生多來從學日與之講墳典確古今訴訴然殆忘乎其爲羈旅也乃扁

雞澤縣志

卷二十六

藝文

三十三

其軒曰享旅云今上嗣位始赦歸田里尋復其官公象魁然議論英發吐音如洪鐘性真質剛方不輕假人辭色遇人之善者雖賤必下之不善者雖大貴人視之蔑如也博極群書文辭蒼鬱綽有秦漢風致氣節才識迥出一時向令得盡展布其所樹立寧可量哉配戴氏封儒人孝敬慈惠雅叶公志側室嚴氏張氏子男二長即孟源嚴出娶平鄉監生張惟憲女次孟池張出聘永年舉人王三畏女女三長戴出適南和生員白憤次嚴出許聘典膳于英男士亨次張出許聘教授康守愚子應乾公生於嘉靖三年二月初三日享年僅四十有八歿之日家無餘資賣田四十畝以葬兆在縣南六里許嗟乎予同公領鄉書公以弟視予予狂慙寡合獨公不予棄豈氣味之有相似耶予嘗病公過亢公亦以予不諧於俗每勸予弗仕相期築室於滌水之涯浮白吟詩以終其天年嗟乎豈意其遽舍而而逝耶痛哉痛哉乃揮涕而爲之銘銘曰胡繼爾才願限於其官胡豐爾德願齎於其年悠悠蒼天竟不知其胡爲而然

明陝西副使殷公大白墓誌銘

尚書 徐石麒 松江

墓誌誌墓也未墓何誌以公之子岳與淵號泣却立三年不衰不能一刻忘墓公故誌也公諱大白別號大陸其先爲山右馬邑人已而遷北地雞澤小寨村蓋五世於茲矣其先皆孝弟力田至封公始力學未售尋入貲爲散官繼孺人李母實生公修髯雄岸耿介嶽嶽然磊磊多節目不妄與人交

人亦恒畏交之讀書嗜古文詞喜涉百家言窮究其旨歸十九以冠軍舉於庠連歷二艱哀毀過當
執斃雞骨立爲劉令所知又能立散斂法儲粟平穀價供伏臘舖里中高年助族之不能葬婚者葬
者各以等問其入則縮廩作權行之措大哉文正公鑿鹽時不識辦此矣己酉舉於鄉試南宮輒見
躡孝廉家居十二年未嘗一謁長史惟聚徒譚經著書爲百城樂有貴人欲爲之廣文一席地者公
夷然不屑就也及諭光山則又斷斷與諸生講禮習射讓齒右恬白露紫水之間營如魯衛矣遇邑
大令則以賓師自居高頤頰峻壇坫令爲改顏禮重之再遷爲比部司嚴簡制諸曹郎不敢以陰陽
懼羶案已調司憲院務又調司鈐務及瓜遼力請南果得南駕部副郎夫司吏部務而南行非例也
所以成公澹也是時南樞密爲呂豫石維祺呂以茂年位參贊駿才靈氣不再一世奴隸視諸屬舊
部文下司體割不檄也參贊更檄之諸兵曹郎嗜宿若俞公彥英妙若錢公位坤卞急若印公司奇
皆跼踖鼻下視奉唯謹公獨以乙榜力爭不可參贊公竟不檄也國家歲漕南省率十鐘而致一石
自僉運法壞殷厚之家藉權貴蔭庇貧者又利穴漕自便於是部僉旗弁恒與貧兒漕一人首相
率並緣爲姦其得輸之大倉之瘡者石不庾釜至殷公所僉弁旗一如割諸大僚及原臺諸長不敢
關一字即參贊有所坐不爲動故其年卒得不大逋後此未有及公者人以是知公能出守叙叙故
漢孔明渡瀘處也夷獠雜處爲不易治公至置水拔薤型仁講讓夷人向風焉郡紳劉公之綸旣殉

節亦夫人糈無依公歲時置糈幣無缺而叙道某挾上臺威又以子諫垣貴橫有所宣索公急持弗
一應卽諫垣以省父至擬以屬禮禮公公亦拒弗與通也川西兵憲邵公捷春平生鮮所許可過叙
廉公治叙狀擊節成古循良無以過遂先通刺定交而去治叙三年以資晉關南道鎮興安時索蕩
諸賊夾治左右伺公過欲挾公求撫索賊卽願殺蕩自效公許之索果提蕩渠頭來公語索曰囊而
弓矢上之公府散而部曲各歸其處隻身肉袒請罪乃可撫也索不能公策其必叛先設伏以俟果
大殲之城北沉於江賊大震又追秃尾狼賊三晝夜轉戰至鳳凰山鹵獲無算又剿搖天動於目連
山得賊級一百三十顆解散難民三千餘人呼聲震山谷是諸役也皆其仲子淵親披鎧胄蠶弧先
登故所向有功公不言功也惟其墾荒儲粟繕城飭防奪赤子於虎吻乳哺之而已歲飭已卯天子
遣督師輔臣楊嗣昌禽薙寇氛以三年養癰之患實嗣昌啟之亦欲使嗣昌蓋之也嗣昌狂躁無恥
旣負天下物議思大有所誅殺以威人心而事難收拾復計借人頸以逸其誅於是因獻賊逃無所
歸罪謬以拒令失機疏請罪公下司寇議司寇甄淑故武陵私人竟以辟上俞之而公則已先易箠
矣其冤狀具公辨疏中余讀狀而不能無悽然於國家刑賞之故也當公駕部時余方以考功計羣
吏知公介直子諫不陵不援計畢擬納交僅一臂卽以守叙去白門之人頌公嘖嘖不去口及守叙
而蜀人之至京師者其嘖嘖公猶白門也迨鎮關中而秦人之至京師者其嘖嘖又如白門也方謂

公可大用無何而武陵疏至疑之然亦未嘗不恨公何不迎頭一擊而坐逸數歲逋誅之寇也及事後訪與武陵共事者袁王兩中丞知獻賊入蜀非其果爲我迫計窮無復之狼狽而去也蓋其習見武陵惑不知兵楚蜀之間可使罷於奔命故佯不顧妻子驅難民餌我於瑯琊山陰挾精騎趣入蜀大破蜀郡縣攻其所必據及武陵入蜀則又馳七日飛破襄致其踉蹌奔歸武陵遂走死前所俘獻賊老弱若棘壁屈乘一時權寄之外府耳按之兵法武陵不能制人反制於人故及於敗惡在其能兵也且瑯琊入蜀路蒙茸險惡非蛇鳥猿猱鮮托足而獻賊起自萬山爲盜走叢箐如鷺我鎮將偏裨不能從尾之者二三矯捷撥兒何戰其所上幕府功狀特諸弁喉黠撥之有口者縱力描繪給武陵賞武陵又欲藉口功已張皇其事不欲更覈虛實故多謾語後獻忠士馬樞強如故無可餽欺則不得不請誅公與蜀撫以掩其欺罔之罪猶賀人龍之逃也以武陵奪兵柄屬左激而使逃及逃又不得不請誅秦督以掩其激變之罪故余謂三臣之寃同一機構惜未有能摘發之者今觀公疏云爲同官夢尹修隙所中噫卽有之如邵如盧復誰中乎陰鷲刻深斯人之忍固性之矣當公刀鋸在頸時猶怵惕不敢發非怵惕不敢發蓋隱忍其辭猶冀世之一悟俗之一改也而如彼狂瀾之旣倒何哉今公寃一日未得白卽一日猶未相土泉歸窆孺子淚中血何時乾姑爲誌之以待夫仲藐諸孤之志公生於萬歷五年十一月初四日沒於崇禎庚辰之七月廿二日歲在龍蛇賢人當嗟其

鷄澤縣志

卷二十六

藝文

三十五

殆是耶恭人田氏庠生田公光前女子二人長岳領庚午賢書娶於康爲海蓋兵備道康公應乾女次淵廩於庠娶於岳爲茂才岳公生周女三女長適儒士安警次適聶生明璠又次適張生祥麟皆諸生一孫女未字甥男女共十二人無他生產所著有五經副墨行於世云銘曰曲如鈞封公侯士一抔直如絃死道邊名千秋天不死公於鄉之瘦狗而死公於楚之沐猴其殆欲使爲濤爲碧照青汗而長留也乎嗚呼呼殷侯培養兮何敢頓忘乎聖祖神宗殘疾之身不能傲西山之高蹈兮願作布衣士同山東父老扶杖以觀太平倫必蔓引株連羅及無辜如民之詛言兮此天未厭亂魯仲連之所以蹈東海而死也其庶幾索余於溝瀆之中

重修永濟橋祝

并序

邑令 祖法敬 正藍

邑治沙陽村爲西北通衢向受洺河水患設永濟橋以便征人近爲洪流衝決褻裳而往者未免歎行道之艱需是橋可時日待乎居民袁洪福等來告修築時余初蒞任嘉其勇於義遂作倡以鼓舞之鳩工庀材經營無間越數月而其工告成上堅礎立柳列堤完克續前謀用垂奕葉洪福等復請爲文以紀落成余乃爲之祝曰

視被征人周道如砥載馳載驅弗沮弗止夜月晨霜吟鞭笑指樵歌牧笛夕陽歸處出作人息子婦皆喜載糗與糧不顧不躓億萬斯年崇其永濟

公募創建文昌閣小引

教諭 尤淑孝 大興

乾隆甲子十一月望後二日本邑文昌祠內回祿爲災邑侯李公偕儒學師紳士等督衆撲滅神龕
几案雖燼祠宇棟楹尙有存者侯與學師既設位拜奠以安神遂與紳士議重修計咸曰諾以時屆
火見工不便姑少待先是邑之文昌祠在縣治西北康熙二十八年邑侯祖公用青烏家言移至文
廟之東偏與奎樓相望垂五十餘年邑人科第較前稍盛明年五月學師與紳士商之邑侯期於丁
祭之辰多士畢集出公疏以募闔邑紳士及寓賢諸同人庶衆力易舉成此鉅工侯曰可又用青烏
家言欲易祠爲閣奎樓南峙神祠北峙更巍煥焉將科名之蔚起士氣之振興又若操左券者昌黎
云莫爲之前雖美弗彰莫爲之後雖盛弗傳兩邑侯之修建是祠後先輝映皆有大造於雞邑之文
風士氣者厥功詎淺鮮哉而出資督工輩亦得附驥益顯云謹疏時乾隆乙丑春王正月也

雜著

元大成至聖文宣王碑陰頌

同知將
作院事 鄧 錡

麒麟格而素王生鳳鳥至而河圖出帝出乎震堯執厥中文王既沒文不在茲乎三皇春也聖人繫周易而天地乾坤定五帝夏也聖人定書而日月星辰紀三王秋也聖人刪詩而人倫政教明五霸冬也聖人作春秋而亂臣賊子懼嗚呼吾夫子聖人也頌曰天何言哉四時行焉地順承天百物生焉三剛五常道德立焉垂統生民萬代師焉天地用誠日月用明大化運行無所成名一以貫之集乎大成

城隍廟鼓銘

邑令 曹孔榮 平湖

維神有靈維鼓有聲靈聲相應不顯精英神以鼓運鼓以神鳴靈揚聲動聲發靈行廉仁良善登聞錫頑貪殘刁橫捷擊如霆鼓舞元氣春長秋成宣鳴神教弊絕風清妖氣或擾一鼓成擒雷轟百里保障永寧

祭劉鈍菴文

康守愚

嗚呼先生之即世也其資志而有憾於杳茫抑瞑目而無憾於幽壤謂無憾耶學不足論道經邦而

鷄澤縣志

卷二十六

藝文

三十七

顧止於雲宮之振羽秘館之掄章才非不足梁棟明堂而顧止於西臺之執法南國之懷棠富宜熾而昌也胡宦邸蕭條而圖書之法惟有空囊壽宜永而康也胡命運舛違而艾期未逮遽陟雲鄉吁嗟乎宜若可傷謂有憾耶天恩寵賚椿萱咸沐乎榮光文詞秀發桃李悉在其門牆宦成名立而三樂之素志終償身輕事足而一枝之燼桂挺芳先生無復遺憾君子以為不亡其所遭值富貴遇也壽夭數也奚較其多少而短長愚借鄰光之有日慚瓊報之無方賄賂備旌帛用將薦蘋藻兮痛榮腸奠椒醕兮淚傾眶陳辭懷想兮意難忘英靈如在兮鑒素棕以來皇

叙州祭諸葛武侯祠文

殷大白

躬耕南陽不求聞達是先王之高也佐帝室之胄鞠躬盡瘁是先生之忠且正也下教羣屬諄切於徐元直董幼輿之千反是先生之不伐也三分畫於隆中八陣壘於江澗與木牛流馬諸製前無古人後無來者是先生之奇也食少事煩未殲賊操而五丈原星隕是先生之憾也伊周才品僅僅成蜀漢四十年兩世之業聖人之於天道果有不合者如孔孟勞勞於衰周之際是先生之遭也終不與古譏

窮歲賦

殷淵

惟愴結之怛惴兮風木寒峭而悲號耿予心之不道兮厥未率絲於嚴考彰徽音於西陲兮構譖哆

於楚槍頹泰山之崔莪兮顧一羽之菲輕曼尤生於任擔兮禍萌於亢卓之潔清嗚呼悲哉皇天不
惠亮兮彼柔如毛兮如狼之貪束絮惟骨載草惟形因風揚燄焚民廛以撓棟隆嗚呼悲哉予曷寧
忍兮遇太行亂潞水涉稷崗黃流逶迤而束濟舟車滂沛而西張哀予考於彼蒼慰靈輓之未返咽
清渭於涇陽仰終南之崒嶂兮佳城麗麓予考兮豈有間於董楊彼賢人之揭揭兮相與引重於泉
壤胡爲乎徂日而邁月霜露遞遷無辜抱怒九原松柏罷枯蒲柳生顏疇日疇月照雪青丹堊
主憐予考之直道兮煒殺彼讒頑焚其庭宇兮渚伊及泉錯骨爲薪兮析肉爲醬呼九族而夕膾聚
里井而朝餐予乃左手據右手振張目視姦鬼驚呼皇天招后土葬吾父語吾母天清明地平臘生
人禾立房堵樂庶黎壽天子予乃披髮於西山之巔稼地耕田抱石倚園追交麋豕躑躅於山谿之
間何日兮太清何日兮太寧聖天不有道兮不忘予之中情詩云既克有定靡人不勝嗚呼兮有恫

思興賦

齊超倫

憶辛亥之孟緬爰束裝而南行歷中州之疆域遙取道於樊城弔襄陽之古郡借鑿齒以標名覽荆
門之勝槩號虎牙而峻嶒由是截荆南越沙市舟子來群艘伺欸乃一聲風流水駛或微波漣漪或
驚濤奔肆或江豕蕩風或沙鷗斂翅信川瀆之呈奇乃舟楫之初試若夫望夷陵而入峽映山色以
乘舟峰迴舵轉榜人載謳恍置身於天際復渺渺兮何求及清灘之既濟登香溪之危樓接敏中之

鷄澤縣志

卷二十六

藝文

三十八

裔子如雅素而綢繆爾乃言從屈里遊彼珠潭秣城聿至觸目峯巒別有天地迥絕人寰其山岵峩
峩嶺盤紆第鬱興霧出雲不崇朝而靈霏灑霏其水淒冽汨汨泓沅怵冲傍山激石歷終古而揚波
轉騰其鳥錦鷄白鷗其獸仙鹿啼猿珍兮異兮更有鷓鴣弄音於樹杪熊虎肆力於山巔其花芍藥
芙蓉其木枇杷冬青妍兮翠兮更有蘭若鬪馥於月榭桂筠隱秀於房櫺四序咸佳春明更媚謝塵
俗之紛囂極登臨以暢意矧家人之萃處共歡笑於一堂時剪燭而夜話每對酌以徜徉怡怡華鄂
之依附殷殷政事之相商方期浹辰遑榻巾友愛於經年其奈觀光畫省遂匆遽以言旋渡建陽而
分袂竟惆悵乎各天今雖閱乎三載情猶繫而未還輒縈想於寤寐羞寄志於蠻箋假長歌以舒嘯
盡遙昔而流漣

古城影賦

生員 王應燿 武進

星分昴度邑號鷄邱沙洛西逝漳溢東流剖玉初頒沫上披圖爰隸冀州暨乎戰國已判春秋漢唐
屢遷其鼎社劉竇更擾以戈矛南郊有田旣委狐嗥豺處北園附郭或湮斷澗寒泓若夫日轂將沉
金波未曜晚景平原夕陽孤廟冷雲歸岫偕楓葉以爭飛倦鳥依人繞林烟而哀叫瀟瀟兮雨欲來
瑟瑟兮風何峭爾乃斥堠遙聞藩垣倏見類海市之參差似蜃樓之隱現三里七里宛小國之方隅
輦斯跂斯儼六朝之宮殺粉堞山樓並著望如霞鬱鬱而心驚銅駝駕瓦齊輝對百雉巍巍而目眩

於是牧童歸去行客徘徊指空中以色駭立廣野而疑猜固阡陌之素曠胡閭闔之忽開信崔嵬之
有影伊城古而未灰亂烟簇起幽響頻來豈涉渭觀泉周民笑語於幽館抑爭妍鬪艷楚女舞歌於
陽臺俄而薄霧捲皎月出挹露氣之日清快水天之若一恨姮娥之轉輪致鮫人以入室丁令威嗟
城郭之已非洛大夫過故宮而若失予乃悠然遠會俯焉踟躕知造物之皆幻識形影之爲虛古今
如逆旅天地我遽廬今日而不樂他人宛自愉何物爲吾有而羨乎漆城之蕩蕩與夫夏屋之渠渠

詩

送聶之美任雞澤縣令

宋資政殿學士 司馬光 涑水

趙魏高氣俠到今風俗然椎埋吏難禁擊斷世稱賢明府宜更瑟罷氏庶息肩無如繭絲者急斂縱敲鞭

送聶之美雞澤官會詩七首

司馬光

明府學既優所聞今得施四境已澄清還以書自怡西齋幾黃卷治原俱在茲
百里在民社古為子男國苟有愛物心稚老皆蒙德為身不為人鄙哉開彭澤
孤樓雖不高足以瞰四遠餉婦陌頭歸田夫桑陰飯飭吏省追胥勿令農事晚
索索夕風迺瀼瀼朝露裊裊寒枝宿螢依敗葉渺然秋興長坐與江湖接
驛道苦車馬田廬悲斧斤誰裁官舍前老朽完天真所願明府心底樹如庇人
村落烟欲曠行人猶未稀借問來往者營營還有無乃知市朝客趨露良可悲
高齋對秋山平望殊不遠雖違獨往心蒼蒼長在眼可嗟都邑遊終日紅塵滿

謁扁鵲廟

大學士 王 磐 洛州

雞澤縣志

卷二十六

藝文

四十

昔為舍長時方伎未可錄一遇長桑君古今長嘆服天地為至仁覆盆不能燭先生爛雙眼毫釐窺
肺腹誰知造化者禍福常倚伏平生活人手反受庸醫辱千年廟前水猶學上池綠再拜藥一杯洗
我胸中俗

金盃玉盤菊

劉 誠

誰將黃白點秋英巧製新裁似逞榮五出高擎金盞小單層輕襯玉盤清不同隱士誇風采欲助詩
仙問月明應是花神解人意開筵酬我賞花情

送劉鈍菴巡按山東

大學士 呂 本 餘姚

衣繡乘驄出帝京霜威風力誓澄清久推純德今長盛共道高才昔更生齊魯盡還人揖讓青徐無
復盜縱橫應知代主東巡重不負登臺獨坐名

贈劉鈍菴清戎江南

編修 嚴 訥 常熟

玉署攻文彥烏臺秉憲即才名掀日月潔操凜冰霜海甸通吳會山川擁建康春風徐攬轡滿路繡
衣裳

送劉鈍菴按閱吳師

主事 王世貞 太倉

六月軍書下三吳憲節懸波文淨組練霜色獲樓船星斗鐘陵近風烟海戍遠按蒐投距出倡勇射

潮便勳業兼文武澄清失後先
豸衣花比繡驄乘玉爲韉伊昔兵戈起曾分閫制專掛帆當使馬握
耒置屯田將帥誅求裏逃亡涕淚前蜀糧還舊日調發念他年赤籍虛難滿蒼生實可憐
蕭條石壕吏悽惻采薇篇寬大崇根本叅停職事權列星齊介陣膏雨潤閭廛不見君山上猶祠別駕賢

過洛河暫宿小韓固

尙書 王一鶚 曲周

古渡黃昏後胡村此暫留
一溪遲渡馬六月強高樓華髮西川思青燈半夜愁
偶經名喪我雅志在林邱

行縣滏陽河泛舟

知府 唐 曜 富順

夏木千重裏長波渺渺來
綠陰亭障合白晝畫圖開
洑魚相泳盤渦鷺並迴銀鞍愁傍險胡作泛舟回

癸亥大水四首

教諭 張拱極 崞縣

萬方玉燭久調和忽然水勢漲官河
平地深於十丈波嗚呼多少填溝壑
依舊征徭奈若何
一旦沙洛兩岸頽翻空惡浪吼風雷
黃雲綠野盡成隈嗚呼桑柘不堪處
安得蠲租紙不催
蛟龍驚走水怒號窮簷葺屋一空濠
淒淒風露苦嗷嗷嗚呼樂天裘何在
願將百里被周遭
西山夜雨泛雞邱十室九空付水溫
生民無計度春秋嗚呼堯夫不復返
今日伊誰濟麥舟

鷄澤縣志

卷二十六

藝文

四十一

入翰林院作

劉錫

聖世求賢不厭貧祇緣善器屬良臣
心同楚璧瑕疵盡德擬揚金煅煉純
好試經綸華上國幾施霖
雨聖壽生民腐儒稔辱陶鎔澤日玷
繩樞魏席珍

城南樓漫興

客懷滿愁况縱目城南樓薰風着我衣
涼思何颼颼薄露散天際弱柳暗汀鷗
鴻鵠下雲霄翻爲燕
雀羞伊昔青門道種瓜東陵侯河海有
濁淺蝴蝶是莊周世事故如此未須傷白頭

送田洛浦巡按滇中

六詔雲烟迴乘驄憲節遊風霜開萬里
狐兔失深秋獨最西台績遙抒南顧憂
點蒼山好上直擬掛
吳鉤

和王元美

雇塞歸來客雞邱見在身憐君朱紱貴
對我白頭人月寫恒山畫樽開北海春
長襄馬上夢回首亦
何頻

金山寺

康應乾

橫江一柱鎮中流天塹奇觀此地收帆影
朝飛京口關鐘聲夜渡海門秋樓臺突起
金鰲背烟火平

臨鐵甕頭借問英雄千古事浪花灌點蓼花洲

至夜迎駕

賈名儒

天子郊禋午夜回駿奔供事肅趨陪六飛五色雲中下八駿雙龍闕下來河影淡隨宮殿轉漏聲遙
傍禁門催履長

以下闕

毛遂墓

大僕寺丞 申佳胤 永年

一劍橫階氣若何平原淺俠盡消磨銅盤熱血驚轡楚錐穎英魂壯盜河碑自蒼蒼看獨峙世多碌
碌許誰過幾回憑弔郊南墓野樹虹光滿碧蘿

前題

檢討 申涵盼 永年

老樹雲封古碣平銅盤歃血氣如生平原夜月烟蘿滿風雨時間一劍鳴

輓王烈女

邑令 賈益謙 陽城

夙能嫺女誠顛沛竟成仁節烈高三輔綱常寄一身孤芳留信史曠典勒楓晨貞性千秋在寧同草
木漣

訪邑令朱方君棄官隱居蘇門

二首之一

殷岳

日月經天地霧霾蔽其照舟楫涉江河或時阻風暴神鬼拘氣數魑魅逞場竈大患吾有身所重在

鷄澤縣志

卷二十六

藝文

四十二

聞道生當諸老後嘉言日來告君子審知幾空山隱文豹

客宮渡除夕詠懷

六首之二

先子古遺直歷官無越思敬勤如一日常恐負虛位比善於嘉禾培信罔弗至除惡絕奈根芟夷惟
力視剛德不干時何為壹以是慟哉生三季終為姦人忌有弟秉家訓守身如處女讀書恥雷同可
否無齟齬卓犖名世資毅然道自許余少鄙繩墨相規極痛楚一朝殉國難吾獨誰與語

雲間有懷申臬盟

正初君北轅囑我守故棲厭我汗漫遊勤及往者迷計君纔抵燕柴門繫馬嘶嘶聲動客愁心跡自
垂睽冬臥賀蘭麓春泛吳淞溪形神燦歲華牛載極東西夸父死逐日丈人老灌畦勞逸非齊物吾
當任天倪

田村看竹歌

平生愛竹緣分薄草堂插檻水土惡東距漳于十五里抱甕灌之苦輟作數年移種法屢更竹醉竹
醒無矩矱曩昔為客老江臯是處蕭蕭響寒籟偶來紫山見流泉溯遊從之有阿閣閣東浪汗千萬
青竿竿拂雲搖碧落小橋隔水曲檻幽梅花亭外桐莫莫叫絕怪石倚雲根何當巨觥兩三酌看竹
何可少主人徙倚欲留無棲泊

三月一日詩

殷淵

念亂悲京國風飈日暝眩亡人歛自聖豐澤長羣姦猾市相勾竊忠厚良靡堅賊臣當權柄養癰襄
水高于盾歷星草號召風雨繁整伍當西寇三秋扶雨蕃綆繫諸王子宮袖泣嬋娟漢家翻社稷莽
操竊中原遂使諸豕發兀兀寇秦關山河控百二指顧入長安大竊仁義聞州縣屢聞然倒戈噎前
磨斷踵執後鞭青組垂尺二抱節不堅完不解廉恥貫生望滿當前妻孥羈陷宰相說遇時艱夏選
蒸髦士編綬三晉間騎驢亡騶從單筴誠汗顏何以坐堂上錦屏開大筵何以御羣下鞭朴作威嚴
明明天子國幽亦鬼可瞰所具無毳羽狗彘同曲拳避亂住高嶺俯視見千巖共道綱常禮戲謔請
暫捐身名負轉睫出處未週全卜筮祝幽意所恃良不專此身如芥草古義殊弗傳丈夫貴磊落坎
坷復何言鄙意拄傾厦趨赴火衆然寧辭天自下不受賊黨控左手躍長戈右手抗鋼鏗立語寫辭
話它懷久以蠲君兮各努力毋令識者憐

上家大人請告詩

一杖幡然老林泉事已幽空囊人自笑滿架我何愁民社還明主桑麻訪舊遊原無崎俗意歸去已
悠悠

秋雨郝元直申鳧盟集小齋見志

鷄澤縣志

卷二十六

藝文

四十三

肝膽藏無地鬚眉笑獨貧長懷天下計猶作布衣人瀝亂秋階草星浮積水蘋二三知己客把酒更
持論

燕邸和素園申先生九日作

清秋高野可人娛風雨淒淒興味孤數道楸枰留醉客一簾草樹宿山癯偶來京國龍魚嘯可道家
園兄弟俱花發滿前愁不盡海天何地說蓴鱸

燕子磯阻風因遊鴻濟寺三台諸洞與家兄聯句

行舟泊燕磯風雨若爲留宗山暑氣延初夏濤聲嘯遠洲淵漁罾翻蜀錦客劍倚吳鈎宗山未了乘
帆願寧當縱壑求淵清溪拖曲磴靈壁墮危樓宗山出巖僧寂寂坐樹鳥啾啾淵茅屋露空翠杉梯
引斷齒宗山惟堪猿上下時共我優游淵風濤渡河曲潯雨下徐洲宗山非自乘桴海亦誰泛蠡舟
淵相思高乙夜雙影照中流宗山渺渺秋天聚明朝幸石尤淵

弔黃溝李將軍墓

銅焦鐵騎晚來空萬派寒沙一壠風欲叩石人渾不語夕陽衰草括英雄

舟過小孤山峯巒秀拔竦立雲表心目肅然因憶先輩云山稱孤獨宇廟塑女郎形爰作此詩
以洗山靈之色

康爾祚

中流屹立鎮江鄉，磊落孤貞迥邁常。八面風波渾不撼，千秋骨鯁目能剛。雲開時挹端凝想，嵐重難親耿介光。繞指世情深浩歎，仰瞻絕壁鬱蒼蒼。

過雞邑遊姜明府治水亭

烟雲籠樹紫霞停，萬姓傾心構此亭。座上金猊閒作篆，塔前白鶴自梳翎。欲澆客面沾村酒，好助詩腸對畫屏。政教何如人詠德，翠微深處隴頭聽。

前題次韻

齊祖望

覓勝青郊客馬停，滿蹊桃李覆新亭。牕紗日細蛛懸網，草烟深鷓墮翎。東郡舍前波似席，西湖岸上柳如屏。蒼茫萬頃桑田徧，曲水流音靜可聽。

重過李將軍墓

苑育藩

一年重到此，野水危橋渡。連河浩白沙，荒林淡日暮。碑橫殘草中，其上千村路。我來疑非昔，走馬回相顧。冥霧帶秋原，高崗立狐兔。麟閣亦何年，但見青邱故。古來勳名人，幾識從前悞。

晴雨眺西山

山氣今茲變，貪看不厭勞。地窮連嶂起，天斷數峯高。空裏生青靄，雲餘泛白濤。寧辭着屐齒，選勝有其曹。

鷄澤縣志

卷二十六

藝文

四十四

辛丑仲冬寶坻學官

五首之二

何事增憂切，微官我軀尋。窮愁仍未減，疲役倍相侵。寒夜一天月，高城萬戶砧。不眠燈欲盡，誰識異鄉心。

自別家林遠，于心猶未平。夢餘千種緒，夜半一時情。海動晨光白，天寒曙色清。淒淒薄宦者，邊際一孤成。

于家口

路入林涯盡，處回平橋碧。草覆芬苔，依村渡口輕舟繫。渠水漁人短棹來，溪引衝烟過鳥去。岸留隨葉動，花開此中可許披裘坐。誰肯掄竿向釣臺。

廣濟寺諸友夜坐

招提引興共登臺，諸友論文向夜來。並膝廬山俱舊好，齊名鄴下自多才。雲移皓月疎簾滿，人立殘鐘古殿開。久話應隨花雨散，林間衣露復徘徊。

重遊三教寺

遠向孤村一徑通，風烟非復舊葱葱。平壇木老重門外，古井沙明落照中。地感蕭條時與變，人憐遲暮物俱同。不須造問千年事，今昔驚看闕咄空。

丁家庄觀沙河呈朱明府三十韻

齊祖望

草枯大野白葉落空林暮瘦日色添澹紛披透遙樹我行傍沙水水澗沙橫素馬蹄踏荒榛蕭颯奔
駭兔冰殘陽欲轉岸裂陰仍沮舊時波中柳垂根赤鬚布面望小橋起穹窿可十步冉冉見征塵知
是邢襄路前村入縣境惆悵寒江鷺坦衍忽成新溪壑已非故一溝細知縷洪流豈能憶昔夏秋
交連綿霖雨澍水漲高邱平森茫接烟霧穴沒狐狸愁巢低鳥雀怖驚龍奮長鬣禾黍隨流仆夜聞
屋垣崩啾啾哭鄰婦倉皇患正迫翻覆計何誤蟻穴時假千鼠牙尙爭訴桑梓非秦越况乃周舟渡
及時共調停奚爲相抵牾築舍謀豈就積薪火方厝斯民亦何辜苦被庸人悞龍門鑿可通瓠子防
猶固孰云此微涓無能殺其怒我俟天下士英年好風度珠玉淨文心甲兵足武庫乘鳧翔我皇濟
川有奇負閭閻議論喧剖析才華裕曲直雖異情眷念無殊願願君希禹功作我中流柱

東遊次槐橋

離家五十里旅况更凄然萬柳含秋色孤村起暮烟園花今日別客馬幾時旋野老慙慙語鄉情尙
自牽

梁家淺渡河

落落疎星暗船開古渡頭秋陰平野合朝翠遠山浮岸近疑相逐波深似不流渺茫烟水際何處起

鷄澤縣志

卷二十六

藝文

四十五

沙鷗

久雨寄懷嚴公偉總戎二首

雨濕山光細空階暗綠莎江干誰載酒海內正投戈名士風流遠窮途感慨多思君三峽下烟水奈
愁何

寂寂連霄雨松關草色迎江添兩岸關雲合萬山平劍氣凌霜古燈花入夜明西陵知己貴惆悵此
時情

會盟臺

周靈御極頒王命晉悼稱雄尙霸才九國君臣爭共主千秋事業見孤臺旁臨古水輕烟散背接高
城遠翠來多少旌旗飛遠處流霞滿目野花開

太行道中

八首
之二

萬嶺嵯峨一水分早寒初凍碧山雲避人飛鳥空中見伏地鳴泉足底聞袖惹殘霞時隱映鞭揮落
葉自披紛細尋幽勝停觀久繫馬隱松散鹿群
怪石枯藤滿眼前異鄉遊子興悽然千峯夾路全無日一線當空尙有天陰翠襲人衣袖冷凍雲迷
望錦屏連山頭那復樵夫到多少蒼松不記年

將赴巴東留別長安諸友

蜀道還聞戰馬鳴孤帆雲外指荒城開樽且共三更醉仗劍何辭萬里行燕市樓臺迷雁影荆門山水入猿聲丈夫離合尋萬事無奈巴江夜雨驚

獲嘉懷古

半榻秋陰欲暗百錢村酒堪沽聞道竹林風景蕭然衰柳啼鳥

火樹銀花合

齊超倫

昇平多樂事况復際良辰火樹連星動銀花映月真聲喧驚宿鳥光燦逐遊人呼友攜醪醑同歌萬歲春

憶家軼少

齊淑倫

金臺八月雁連行日極征輪歸故鄉準擬先鞭同祖述寧知峻坂失孫陽遷流律呂秋光老寂寞琴書刻漏長更值年華催短鬢思兄不禁九迴腸

漢口渡江達武昌遇風

朔風次浪大江頭鄂渚奇觀指顧收樓閣崢嶸浮兩岸魚龍跋躑撼中流日昏練影疑飛雪人逐洪濤不見舟爲竭馳驅膽愈壯宗生事業足千秋

鷄澤縣志

卷二十六

藝文

四十六

擬限字作

田梓

千尺桃花萬丈溪十年九戍隴函西寸腸百結三更雨半榻孤燈五夜雞八駿雙馳四塞迥七絃一闕兩心齊六軍駐馬知何處愁聽鶯聲二月啼

盜河

王寬

潺潺一帶水流聲亘古盜河繞趙城堪向中流擊祖楫好從清湍濯孺纓銅爐斷岸千秋湧鐵鍛波心一派清幾度溯洄還攬轡安同洗耳去逃名

過漂母祠

齊封

漂母祠前水仍同舊日流我來漂絮處人逝已千秋竚立不能去飄風吹敝裘一飯何足道所重在雙眸重瞳號英武執戟丈夫羞豁達如龍準應慚夜月求不謂一女子而能識韓侯進食不望報一語聖賢儔淮水有時竭高風亘古留人生貴知己千金安足酬

贈邑令郎明府

翩翩公子暫飛鳧有譜傳家治績殊半榻琴書長物少一庭花草訟人無繪圖和淚于明主發粟流膏起餓癯百里奚能羈鳳翼願爲霖雨潤寰區

恭和御製射柳亭詩原韻二首

庚午八月委磁辦道適在其地賦此

神功聖德軼前雄
四表光昭決拾中
自是騶虞徵應節
非關羽獵耀從風
時巡補助貽謀合
和會趨

王光燮

鎗盛烈同法祖
勤民惟敬畏
不須引滿試瑠弓
溢水齧山地勢雄
萬騎雲集綠柳中
亭前宿鳥依舒日
樹外飛鴻望遠風
已見恩膏四野遍
還知景物入
挺同小臣簪筆慚
枚馬時邁颺歌麩
矢弓

盟臺懷古

杜學詩

玉帛金銷霸業收
猶餘故壘在雞邱
堦前衰草蒼苔滿
臺上荒榛牧豎遊
夜月空明殘砌畔
秋風遙起舊城頭
殷勤欲問春秋事
溢水寒聲咽不流

靈棘行

邑令 王光燮 武進

武安廟中挺靈棘
枝葉蕭疎幹扶直
霜皮溜雨八尺圍
榮枯相半蒼蒼色
梧寒梨病堪嗟吁
堅剛不受風霜蝕
小棗安能獨久延
栽培端賴神明力
憶昔嚴威震襄荊
一木孤撐大厦傾
阿瞞不敢窺巴蜀
仲謀亦復斂縱橫
誰識金刀歷數盡
瞬息棟折而榱崩
浩氣未平何所寄
婆娑生意長向榮
繚繞香烟開紫霧
鷓邱蕞爾時呵護
在宋雲霄戰蚩尤
近聞射水蛟却步
遺愛勿剪召甘棠
論功特呼馮大樹
廟貌峩峩棘巍巍
千年不盡靈根慕

鷓澤縣志

卷二十六

藝文

四十七

會盟臺

烟痕漠漠水痕平
蕭索荒臺傍舊城
千古牲牢埋熱血
一天風雨鎖寒盟
尊王空復誇三晉
挾主何堪問兩京
太息雄圖銷盡後
古碑剝落草縱橫

鳳起山

小築林邱問已經
覽輝並擬構新亭
幾年屏幃開圖畫
半郭烟巒入杳冥
官閣春融晴樹綠
井廬夕照晚山青
無邊明月邀恒步
驚起沙鷗撲水汀

鷓邱八景

寶城劉壘兩蕭然
惟有盟臺入史編
晉悼不知尊錫命
滏陽北去盡桑田

晉侯盟臺

獨扶炎漢意何深
枯棘猶留未死心
若得少陵過此地
不應獨賦栢森森

關廟靈棘

鳳起山頭月半環
五更曙色滿烟鬢
青鸞舞罷姮娥鏡
又見朝陽五色班

鳳山曉月

春風冉冉入洛溪
宿來連雲千畝齊
欲話桑麻停短棹
忽聽布穀隴頭啼

洛浦春畦

金身曾說夢丹墀
石佛緣何浸綠漪
果使慈航能渡世
應教花雨滿神池

石佛神池

澤國千村水四圍
碧霞宮殿轉嵯巍
雲烟漠漠青畦外
好擬題詩上翠微

金龍飛閣

樓閣空中照眼明
夕陰廣野氣成城
層樓雉終難久始
信秦優有鑑衡

古城幻影

冀野千年近紫宸河山依舊治功新安瀾慶後渾無事載酒新亭看隴春

治水新亭

祝景縣公壽辰二首

邑人何朝相

節序欣隨梅雨和一庭皎月照沼河薰風四座清琴鶴惠政千門試咏歌循績應時承 帝簡神君指日沐天波種花滿縣逢初度共進三多衍慶多

長庚燦燦五雲隈日麗琴堂壽域開圖自篋中瞻五岳人從座上識三台金莖承露來仙掌絳節和恩下 帝階載道口碑歌父母居然花縣有蓬萊

廟臺踏青

徐步行來古廟臺繁華競秀及時開遠觀雖少山河景近觀却多文武才萬物一天皆吐色斯人滿地共啣杯南牕安坐凄然意那似行遊一暢哉

御製沙柳暗藏橋

煙雲層疊繞沙隈極目蒼茫柳不開向外渾疑無處渡從中方見有人來魚梁不盡瀟瀟水堤樹還飄細細埃此日憑臨天地小依欄情興獨徘徊

選積名詩

自古稱佳句 聖朝亦重詩酬知既愧拙選積莫嫌遲振奮搜羅志懇懃做做期按翻叢雅韵檢閱

鷄澤縣志

卷二十六

藝文

四十八

夥名詞俊逸參軍筆清新開府思吟呻功到後免賦獻當時

盟臺懷古

六皖方夢袍

物換星移霸業空當年此地築蒲宮載書牛耳推三駕故壘雞邱嘆七雄上客銅盤碑沒草將軍石馬夜嘶風高旻木葉蕭蕭下望魯門東月似弓

雞城懷古

邑人王錦林 蕭山

行行雞澤地衛趙詢遺踪劉寶曾分據金元始列封 皇朝承勝國末吏愧新墉為慕平原客軒軒慷慨容

牛尾河挑竣紀事二首

牛河淺狹不通舟怒肆馮夷浩淼流奠定自勞神禹計決排又奉大官謀分明源委東西脉築鑿高深遠近洲灌溉有資忘旱溢無庸重把水亭修
沉璧中流為擊磬萬夫畚插不辭勞披風沐雨籌溝塹足泥身弄桔槔幾日金堤成鞏固一朝銀浪息波濤晚晴閒眺鱗塘影楊柳垂垂映綠條

文廟告成紀事

傾頽廟貌露煙熏士習猶知樂采芹欲振毛生留典雅敢辭魯相任懇懃增補金鸞輝新制

依大宗伯陳熹華所

議文廟悉用黃瓦故云崇拓卑基煥大文正殿升高數尺幾去低徊加敬肅鳳頭牛尾漸生雲

雞邑八景八首

晉侯盟臺

古壘西風起當年會列侯衣裳來魯衛年月紀春秋隱隱西山影濺濺東溢流蒼茫烟霧裏殘碣立群鷗

關帝靈棘

金石扶劉志忠魂百代馨寒枝光日月勁幹薄雷霆烏栢西臺瑞音槐南省靈金城留翠色孔檜與同青

鳳山曉月

山從平地起良夜試登攀彩鳳寥天際銀蟾落照間羅浮驚翠羽雲夢繞烟鬢擬觀蓬萊上瑤池印玉環

沼浦春畦

烟波沼浦繞芳草綠萋萋蛙鬧公私地鴉飛高下堤新圖思欲畫好句夢堪題田叟怡春趣輕鞭緩把犁

鷄澤縣志

卷二十六

藝文

四十九

石佛神池

何年真佛性清水碧粼粼石企峰頭足泉流彼岸春方塘浮寶筏群鳥喚迷津能濯污泥染長留智慧神

金龍飛閣

巍巍聳北郭峭拔欲橫飛波浪搖金碧翠恩接翠微步虛聲徹漢眺遠影懸輝小向橋邊立天花落指揮

古城幻影

農桑今樂土前古幾鑿兵偶值雲烟結旋聞車馬聲望中懸舊堞影裏列連營曉日清光顯樓臺片刻傾

治水新亭

汨沒牛河水闌干幾獨凭勞勞動吏績歷歷遠村燈追溯波濤險欣看衽席登醉翁如眺此豐樂記新增

